



宋書  
七



|      |
|------|
| リ 8  |
| 1735 |
| 93   |





特  
1735  
93

宋書卷二十四

志第十四

天文二

晉惠帝元康二年二月天西北大裂按劉向說天裂陽不足地動陰有餘是時人主拱默婦后專制

元康三年四月熒惑守太微六十日占曰諸侯三公謀其上必有斬臣一曰天子亡國是春太白守畢至是百餘日占曰有急令之憂一曰相亡又為邊境不安是年鎮歲太白三星聚于畢昴占曰為兵喪畢昴趙地也後賈后陷殺太子趙王廢后又殺之斬張華裴頡遂篡位廢帝為太上皇天下從此遘亂連禍

元康五年四月有星孛于奎至軒轅太微經三台大陵占曰奎為魯又為庫兵軒轅為後宮太微天子廷三台為三司大陵有積屍



氏周而市



死喪之事明年武庫火西羌反後五年司空張華遇禍賈后廢死魯公賈謐誅又明年趙王倫篡位於是三王興兵討倫士民戰死十餘萬人

元康六年六月丙午夜有枉矢自斗魁東南行按占曰以亂伐亂北斗主執殺出斗魁居中執殺者不直象也十月太白晝見後趙王殺張裴廢賈后以理太子之寃因自篡盜以至屠滅以亂伐亂兵喪臣彊之應也

元康九年二月熒惑守心占曰王者惡之八月熒惑入羽林占曰禁兵大起後二年惠帝見廢爲太上皇俄而三王起兵討倫倫悉遣中軍兵相距累月

晉惠帝永康元年三月妖星見南方中台星坼太白晝見占曰妖星出天下大兵將起台星失常三公憂太白晝見爲不臣是月賈

后殺太子趙王倫尋廢殺后及司空張華又廢帝自立於是三王並起迭總大權

永康元年五月熒惑入南斗占曰宰相死兵大起斗又吳分也是時趙王倫爲相明年篡位三王興師誅之太安二年石冰破揚州

永康元年八月熒惑入箕占曰人主失位兵起十二月彗出牽牛之西指天市占曰牛者七政始彗出之改元易號之象也天市一名府一名天子襟帝座在其中明年趙王篡位改元尋爲大兵所滅

永康二年二月太白出西方逆行入東井占曰國失政臣爲亂四月彗星見齊分占曰齊有兵喪是時齊王罔起兵討趙王倫倫滅罔擁兵不朝專權淫侈明年誅死

晉惠帝永寧元年自正月至于閏月五星互經天星傳曰日陽君



道也星陰臣道也日出則星亡臣不得專也晝而星見午上者爲經天其占爲不臣爲更王今五星悉經天天變所未有也石氏說曰辰星晝見其國不亡則大亂是後台鼎方伯互秉大權二帝流亡遂至六夷彊迭據華夏亦載籍所未有也

永寧元年五月太白晝見占同前條七月歲星守虛危占曰水守虛危有兵憂一曰守虛飢守危徭役煩下屈竭辰星入太微占曰爲內亂一曰羣臣相殺太白守右掖門占曰爲兵爲亂賊八月戊午鎮星犯左執法又犯上相占曰上相憂熒惑守昴占曰趙魏有災辰星守輿鬼占曰秦有災九月丁未月犯左角占曰人主憂一曰左將軍死天下有兵

二年四月癸酉歲星晝見占曰爲臣彊十月熒惑太白鬪于虛危占曰大兵起破軍殺將虛危又齊分也十二月熒惑襲太白于營

室占曰天下兵起亡君之戒一曰易相初齊王罔定京都因留輔政遂專傲無君是月成都河間檄長沙王又討之罔又交戰攻焚宮闕罔兵敗夷滅又殺其兄上軍將軍寔以下二十餘人太安二年成都攻長沙於是公私飢困百姓力屈

晉惠帝太安二年二月太白入昴占曰天下擾兵大起三月彗星見東方指三台占曰兵喪之象三台爲三公七月熒惑入東井占曰兵起國亂是秋太白守太微上將占曰上將將以兵亡是年冬成都河間攻洛陽三年正月東海王越執長沙王又張方又殺之太安二年八月長沙王奉帝出距二王庚午舍于玄武館是日天中裂爲二有聲如雷三占同元康臣下專僭之象也是時長沙王擅權後成都河間東海又迭專威命是其應也

太安二年十一月辛巳有星晝隕中天北下有聲如雷按占名曰



熒首熒首所在下有兵流血明年劉淵石勒攻畧并州多所殘滅王浚起燕代引鮮卑攻掠鄴中百姓塗地有聲如雷怒之象也太安二年十一月庚辰歲星入月中占曰國有逐相十二月壬寅太白犯月占曰天下有兵太安三年正月己卯月犯太白占同青龍熒惑入南斗占同永康是月熒惑又犯歲星占曰有大戰七月左衛將軍陳暉率眾奉帝伐成都六軍敗績兵逼乘輿九月王浚又攻成都于鄴鄴潰成都王由是喪亡帝還洛張方脅如長安是時天下盜賊羣起張昌尤盛後二年惠帝崩

晉惠帝永興元年五月客星守畢占曰天子絕嗣一曰大臣有誅七月庚申太白犯角亢經房心歷尾箕九月入南斗占曰犯角天下大戰犯亢有大兵人君憂入房心爲兵喪犯尾將軍與民人爲變箕女主憂一曰天下亂入南斗有兵喪一曰將軍爲亂其所犯

守又兗豫幽冀揚州之分也是年七月蕩陰之役九月王浚殺幽州刺史和演攻鄴鄴潰於是兗豫爲天下兵衝陳敏又亂揚土劉淵石勒李雄等並起微賤跨有州郡皇后羊氏數被幽廢光熙元年惠帝崩終無繼嗣

永興元年七月乙丑星隕有聲二年十月星又隕有聲按劉向說民去其土之象也是後遂亡中夏

永興元年十二月壬寅夜赤氣亘天砰隱有聲二年十月丁丑赤氣見在北方東西竟天占曰並爲大兵砰隱有聲怒之象也是後四海雲擾九服交兵

永興二年四月丙子太白犯狼星占曰大兵起九月歲星守東井占曰有兵并又秦分也是年苟晞破公師蕃張方破范陽王虓關西諸將攻河間王顒顒奔走東海王迎殺之



永興二年八月星孛于昴畢占曰爲兵喪昴畢又趙魏分也十月  
丁丑有星孛于北斗占曰璿璣更授天子出走又曰疆國發兵諸  
侯爭權是後皆有其應明年惠帝崩

晉惠帝光熙元年四月太白失行自翼入尾箕占曰太白失行而  
北是謂返生不有破軍必有屠城五月汲桑攻鄴魏郡太守馮嵩  
出戰大敗桑遂害東燕王騰殺萬餘人焚燒魏時宮室皆盡

光熙元年五月枉矢西南流占曰以亂伐亂之象也是時司馬越  
西破河間奉迎大駕尋收繆胤何綏等肆其無君之心天下惡之  
死而石勒焚其屍字缺一是其應也

光熙元年九月丁未熒惑守心占曰王者惡之巳亥填星守房心  
又犯歲星占曰土守房多禍喪守心國內亂天下赦又曰填與歲  
合爲內亂是時司馬越秉權終以無禮破滅內亂之應也十一月

惠帝崩懷帝卽位大赦天下

光熙元年十二月癸未太白犯填星占曰爲內兵有大戰是後河  
間王爲東海王越所殺明年正月東海王越殺諸葛政等五月汲  
桑破馮嵩殺東燕王八月荀晞大破汲桑

光熙元年十二月甲申有白氣若虹中天北下至地夜見五日乃  
滅占曰大兵起明年王彌起青徐汲桑亂河北毒流天下

孝懷帝永嘉元年九月辛卯有大星自西南流于東北小者如升  
相隨天盡赤聲如雷占曰流星爲貴使是年五月汲桑殺東燕王  
騰遂據河北十一月始遣和郁爲征北將軍鎮鄴而田甄等大破  
汲桑斬于樂陵於是以甄爲汲郡太守弟蘭鉅鹿太守小星相隨  
小將別帥之象也司馬越忿魏郡以東平原南皆黨於桑悉以賞  
甄等於是侵略赤地有聲如雷怒之象也



永嘉元年十二月丁亥星流震散案劉向說天官列宿在位之象  
小星無名者庶民之類此百官庶民將流散之象也是後天下大  
亂百官萬民流移轉死矣

永嘉二年正月庚午太白伏不見二月庚子始晨見東方是謂當見  
不見占同上條其後破軍殺將不可勝數帝崩虜庭中夏淪覆

永嘉三年正月庚子熒惑犯紫微占曰當有野死之王又爲火燒  
宮是時太史令高堂沖奏乘輿宜遷率不然必無洛陽五年六月  
劉曜王彌入京都燒宮廟帝崩于平陽

永嘉三年鎮星久守南斗占曰鎮星所居者其國有福是時安東  
琅邪王始有揚土其年十一月地動陳卓以爲是地動應也

永嘉三年十二月乙亥有白氣如帶出東南北方各二起地至天  
貫參伐占曰天下大兵起四年三月司馬越收繆胤繆播等又三

方雲擾攻戰不休五年三月司馬越死於甯平城石勒攻破其衆  
死者十餘萬人六月京都焚滅帝劫虜庭

永嘉五年十月熒惑守心後二年帝崩于虜庭

永嘉六年七月熒惑歲星鎮星太白聚牛女之間襄回進退按占  
曰牛揚州分是後兩都傾覆而元帝中興揚土是其應也

愍帝建武元年五月癸未太白熒惑合于東井占曰金火合曰爍  
爲喪是時帝雖劫于平陽天下猶未敢居其虛位災在帝也六月  
丁卯太白犯太微占曰兵入天子廷王者惡之七月愍帝崩于寇  
庭天下行服大臨

晉元帝大興元年七月太白犯南斗占曰吳越有兵大人憂二年  
二月甲申熒惑犯東井占曰兵起貴臣相戮八月己卯太白犯軒  
轅大星占曰後宮憂乙未太白犯歲星在翼占曰爲兵亂三年四



月壬辰枉矢出虛危沒翼軫占曰枉矢所觸天下之所伐翼軫荆  
州之分也五月戊子太白入太微又犯上將占曰天子自將上將  
誅六月丙辰太白與歲星合于房占曰爲兵饑九月太白犯南斗  
占同元年十月己亥熒惑在東井居五諸侯南踟躕留止積三十  
日占曰熒惑守井二十日以上大人憂守五諸侯諸侯有誅者十  
二月己未太白入月在斗郭景純曰月屬坎陰府法家也太白金  
行而來犯之天意若曰刑理失中自毀其法也四年十二月丁亥  
月犯歲星在房占曰其國兵饑民流亡

永昌元年三月王敦率江荆之衆來攻京都六軍距戰敗績於是  
殺護軍將軍周顛尚書令刁協驃騎將軍劉隗出奔四月又殺湘  
州刺史譙王承鎮南將軍甘卓閏十二月元帝崩間一年敦亦梟  
夷枉矢觸翼之應也十月石他入豫州略城父鉅二縣民以北刺

史祖約遣軍追之爲其所沒遂退守壽春

明帝大寧三年正月熒惑逆行入太微占曰爲兵喪王者惡之閏  
八月帝崩咸和二年蘇峻反攻宮室太后以憂逼崩天子幽劫于  
石頭遠近兵亂至四年乃息

成帝咸和四年七月有星孛于西北二十三日滅占曰爲兵亂十  
二月郭默殺江州刺史劉胤荊州刺史陶侃討默明年斬之是時  
石勒又始僭號

咸和六年正月丙辰月入南斗占曰有兵一曰有大赦是月胡賊  
殺略婁武進二縣民於是遣戍中洲明年胡賊又略南沙海虞民  
是年正月大赦伐淮南討襄陽平之

咸和六年十一月熒惑守胃昴占曰趙魏有兵八年七月石勒死  
石虎自立多所殘滅是時雖勒虎僭號而其强弱常占於昴不關



太微紫宮也

咸和八年三月己巳月入南斗與六年占同其年七月石勒死彭彪以譙石生以長安郭權以秦州並歸從於是遣督護高球率眾救彪彪敗球退又石虎石斌攻滅生權咸康元年正月大赦

咸和八年七月熒惑入昴占曰胡王死石虎多所攻滅八月月犯昴占曰胡不安九年六月月又犯昴是時石弘雖襲勒位而石虎擅威暴橫十月廢弘自立遂幽殺之

咸和九年三月己亥熒惑入輿鬼犯積屍占曰兵在西北有沒軍死將四月鎮西將軍雍州刺史郭權始以秦州歸從尋為石斌所滅徙其眾於青徐

晉咸康元年二月己亥太白犯昴占曰兵起歲大旱四月石虎掠騎至歷陽朝廷慮其眾也加司徒王導大司馬治兵動眾又

遣慈湖牛渚燕

三戌五月乃罷是時胡賊又圍襄陽征西將軍

庾亮遣寧距退之六月旱

咸康元年八月戊辰熒惑入東井占曰無兵兵起有兵兵止是年夏發眾列戍加王導大司馬以備胡賊

咸康元年三月丙戌月入昴占曰胡王死十一月月犯昴二年八月月又犯昴占同咸和三年石虎發眾七萬四年二月自襲段遼于薊遼奔敗又攻慕容皝於棘城不剋引退皝追之殺數百人虎留其將麻秋屯令支皝破秋并虜遼殺之

咸康二年正月辛巳彗星夕見西方在奎占曰為兵喪奎又為邊兵四年石虎伐慕容皝不剋皝追擊之又破麻秋時皝稱蕃邊兵之應也

咸康二年正月辛卯月犯房南第二星占曰將相有憂五年七月



丞相王導薨八月太尉郗鑒薨六年征西大將軍庾亮薨

咸康二年九月庚寅太白犯南斗因晝見占曰斗爲宰相又揚州分金犯之死喪象晝見爲不臣又爲兵喪三年石虎僭稱天王四年虎滅段遼而敗於慕容皝皝國蕃臣五年王導薨

咸康三年六月辛未流星大如二斗魁色青赤光耀地出奎中沒婁北按占爲饑五穀不藏是月大旱

咸康三年八月熒惑入輿鬼犯積屍占曰賢人憂三年八月甲戌月犯東井距星占曰國有憂將死三年九月戊子月犯建星占曰易相一曰大將死五年丞相王導薨庾冰代輔政太尉郗鑒征西大將軍庾亮薨

咸康三年十一月乙丑太白犯歲星占曰爲兵饑四年二月石虎破幽州遷其人萬餘家李壽殺李期五年胡衆五萬寇河南略七

千餘家而去又騎二萬圍陷邾城殺略五千餘人

咸康四年四月己巳太白晝見在柳占曰爲兵爲不臣七月乙巳月掩太白占曰王者亡地大兵起明年胡賊大寇河南陷邾城豫州刺史毛寶西陽太守樊俊皆棄城投江死於是內外戒嚴左衛桓監匡術等諸軍至武昌乃退七年慕容皝自稱爲燕王

咸康四年五月戊午熒惑犯右執法占曰大臣死執政者憂九月太白犯右執法按占五星災同金火尤甚十一月戊子太白犯房上星占曰上相憂五年七月己酉月犯房上星亦同占是月庚申丞相王導薨

咸康五年四月辛未月犯歲星在胃占曰國饑民流乙未月犯畢距星占曰兵起是夜月又犯歲星在昴及冬有河南邾城之敗百姓流亡萬餘家



咸康六年二月庚午朔流星大如斗光耀地出天市西行入太微  
占曰大人當之乙未太白入月占曰人主死四月甲子月犯太白  
占曰人主惡之八年六月成帝崩

咸康六年三月甲寅熒惑從行犯太微上將星占曰上將憂四月  
丁丑熒惑犯右執法占曰執法者憂六月乙亥月犯牽牛中央星  
占曰大將憂是時尚書令何充爲執法有譴欲避其咎明年求爲  
中書令建元二年庾冰薨皆大將執政之應也是歲正月征西將  
軍庾亮薨三月而熒惑犯上將九月石虎大將夔安死庾冰後積  
年方薨豈冰能修德移禍於夔安乎

咸康六年四月丙午太白犯畢距星占曰兵革起一曰女主憂六  
月乙卯太白犯軒轅大星占曰女主憂七年三月皇后杜氏崩  
咸康七年三月壬午月犯房占曰將相憂八年六月熒惑犯房上

第二星占曰次相憂建元二年車騎將軍江州刺史庾冰薨是時  
驃騎將軍何充居內冰爲次相也

咸康七年四月己丑太白入輿鬼占曰兵革起五月太白晝見以  
畧度推之非秦魏則楚也占曰爲臣彊爲有兵八月辛丑月犯輿  
鬼占曰人主憂八年六月成帝崩

咸康八年八月壬寅月犯畢赤星占曰下犯上兵革起十月月又  
掩畢赤星占同己酉太白犯熒惑占曰大兵起其後庾翼大發兵  
謀伐胡專制上流朝廷憚之

康帝建元元年正月壬午太白入昴占曰趙地有兵又曰天下兵  
起四月乙酉太白晝見八月丁未太白犯歲星占曰有大兵是年  
石虎殺其太子遂及其妻子徒屬二百餘人又遣將劉寧寇沒狄  
道又使將張舉將萬餘人屯薊東謀慕容皝



建元元年十一月六日彗星見亢長七尺尾白色占曰亢爲朝廷主兵喪二年九月康帝崩

建元元年歲星犯天關安西將軍庾翼與兄冰書曰歲星犯天關占云關梁當澁比來江東無他故江道亦不艱難而石虎頻年再開關不通信使此復是天公憤憤無皂白之徵也

建元二年閏月乙酉太白犯斗占曰爲喪天下受爵祿九月康帝崩太子立大赦賜爵也

晉穆帝永和元年正月丁丑月入畢占曰兵大起戊寅月犯天關占曰有亂臣更天子之法五月辛巳太白晝見在東井占曰爲臣疆秦有兵六月辛丑入太微犯屏西南占曰輔臣有免罷者七八月月皆犯畢占同正月己未月犯輿鬼占曰大臣有誅九月庚戌月又犯畢是年初庾翼在襄陽七月翼疾將終輒以子爰之爲荆

州刺史代已任爰之尋被廢明年桓溫又輒率衆伐蜀執李勢送  
至京都蜀本秦地也

永和二年二月壬子月犯房上星四月丙戌月又犯房上星占同前八月壬申太白犯左執法是歲司徒蔡謨被廢

永和三年正月壬午月犯南斗第五星占曰將軍死近臣去五月壬申月犯南斗第四星因入魁占曰有兵一曰大赦六月月犯東井距星占曰將死國有憂戊戌月犯五諸侯占曰諸侯有誅九月庚寅太白犯南斗第五星占曰爲喪兵四年七月丙申太白犯左執法甲寅月犯房丁巳月入南斗犯第二星乙丑太白犯左執法占悉同上十月甲戌月犯亢占曰兵起軍將死十一月戊戌犯上將星三年六月大赦是月陳達征壽春敗而還七月氏蜀餘寇反亂益土九月石虎伐涼州不克



永和四年四月太白入昴五月熒惑入婁犯鎮星七月太白犯軒轅占在趙及爲兵喪女主憂其年八月石虎太子宣殺弟韜宣亦死五年正月石虎僭稱皇帝尋病死是年褚裒北伐喪衆又尋薨太后素服六年正月朝會廢樂

永和五年四月丁未太白犯東井占曰秦有兵九月戊戌太白犯左角占曰爲兵十月月犯昴占曰朝廷有憂軍將死十一月乙卯彗星見于亢芒西向白長一丈占曰爲兵喪是年八月褚裒北征兵敗十月關中二十餘壁舉兵歸從石遇攻沒南陽十一月冉閔殺石遵父盡殺胡十餘萬人於是中土大亂十二月褚裒薨八年劉顯苻健慕容俊並僭號殷浩北伐敗見廢

永和六年二月辛酉月犯心大星占曰大人憂心豫州分也丁丑月犯房占曰將相憂三月戊戌熒惑犯歲星占曰爲戰六月己丑月犯昴占同上乙未月犯五諸侯占同三年七月壬寅月始出西方犯左角占曰大將軍死一曰天下有兵丁未月犯箕占曰軍將死丙寅熒惑犯鉞星占曰大臣有誅八月辛卯月犯左角太白晝見在南斗月犯右執法占並同上七年二月太白犯昴占同上乙卯熒惑輿鬼犯積屍占曰貴人憂五月乙未熒惑犯軒轅太白占曰女主憂太白入畢口犯左股占曰將相當之六月乙亥月犯箕丙子月犯斗丁丑熒惑入太微犯右執法八月庚午太白犯軒轅戊子太白犯右執法占悉同上七年劉顯殺石祗及諸胡帥中土大亂戎晉十萬數各還舊土互相侵略及病疫死亡能達者十二三是年桓溫輒以大衆求浮江入淮北伐朝廷震懼八年豫州刺史謝尚討張遇爲苻雄所敗殷浩北伐敗被廢十年桓溫伐苻健不克而還



永和八年三月戊戌月犯軒轅大星癸丑月入南斗犯第二星五月月犯心星四月癸酉月犯房六月辛巳日未入有流星如三斗魁從辰巳上東南行晷度推之在箕斗之間蓋燕分也按占爲營首營首之下流血滂沱七月壬子歲星犯東井距星占口內亂兵起八月戊戌熒惑入輿鬼占曰忠臣戮死丙辰太白入南斗犯第三四星占曰將爲亂一曰丞相免九年二月乙巳入南斗犯第三星三月戊辰月犯房八月歲星犯輿鬼東南星占東南星主兵兵起十二月月在東井犯歲星占曰秦饑民流是時帝主幼冲母后稱制將相有隙兵革連起慕容俊僭稱大燕攻伐無已故災異數見殷浩見廢也

永和十年正月乙卯月食昴占曰趙魏有兵癸酉填星奄鉞星占曰斧鉞用二月甲申月犯心大星占曰王者惡之四月癸未流星大如斗色赤黃出織女没造父有聲如雷占曰燕齊有兵民流戊午月犯心大星七月庚午太白晝見晷度推之災在秦鄭九月辛酉太白犯左執法十一月月奄填星在輿鬼占曰秦有兵十一年三月辛亥月奄軒轅占同上四月庚寅月犯牛宿南星占曰國有憂八月己未太白犯天江占曰河津不通十二年六月庚子太白晝見在東井占如上己未月犯鉞星七月丁卯太白犯填星在柳占曰周地有大兵八月癸酉月奄建星九月戊寅熒惑入太微犯西蕃上將星十一月丁丑熒惑犯太微東蕃上相十年四月桓溫伐苻健破其堯柳衆軍健壁長安溫退十二月慕容恪攻齊十二年八月桓溫破姚萇於伊水定周地十一月齊城陷執段龔殺三千餘人永和末鮮卑侵略河冀升平元年慕容俊遂據臨漳盡有幽并青冀之地緣河諸將漸奔散河津隔絕矣三年會稽王以郗



曇謝萬敗績求自貶三等是時權在方伯九服交兵故譴象仍見  
晉穆帝升平元年四月壬子太白入輿鬼丁亥月奄東井南轅西  
頭第二星占曰秦地有兵一曰將死六月戊戌太白晝見在軫占  
同上軫楚分也壬子月犯畢占曰爲邊兵七月辛巳熒惑犯天江  
占曰河津不通十一月歲星犯房壬午月奄歲星在房占曰民饑  
一曰豫州有災二年二月辛卯填星犯軒轅大星甲午月犯東井  
閏月乙亥月犯歲星在房占悉同上五月丁亥彗出天船在胃度  
中彗爲兵喪除舊布新出天船外夷陵一曰爲大水六月辛酉月  
犯房八月戊午熒惑犯填星在張占曰兵大起張三河分十月已  
未太白犯哭星十二月枉矢自東南流于西北其長半天三年正  
月壬辰熒惑犯楗閉按占人主憂三月乙酉熒惑逆行犯鉤鈴按  
占王者惡之月犯太白在昴占曰人君死一曰趙地有兵朝廷不

安六月太白犯東井七月乙酉熒惑犯天江丙戌太白犯輿鬼占  
悉同上戊子月犯牽牛中央大星占曰牽牛天將也犯中央星大  
將軍死八月丁未太白犯軒轅大星甲子月犯畢大星占曰爲邊  
兵一曰下犯上庚午太白犯填星在太微中占曰王者惡之二年  
五月關中氏帥殺苻生立堅十二月慕容俊入屯鄴八月安西將  
軍豫州刺史謝奕薨三年十月諸葛攸舟軍入河敗績豫州刺史  
謝萬入潁衆潰而歸除名爲民十一月司徒會稽王以二鎮敗求  
自貶三等四年正月慕容俊死子煒代立慕容殺其尚書令陽騫  
等五月天下大水五年五月穆帝崩  
升平四年正月乙亥月犯牽牛中央大星占曰大將死六月辛亥  
辰星犯軒轅占曰女主憂巳未太白入太微右掖門從端門出占  
曰貴奪勢一曰有兵又曰出端門臣不臣八月戊申太白犯氏占



曰國有憂丙辰熒惑犯太微西上將九月壬午太白入南斗口犯第四星占曰爲喪有赦天下受爵祿十月庚戌天狗見西占曰有大兵流血十二月甲寅熒惑犯房丙寅太白晝見庚寅月犯鍵閉占曰人君惡之五年正月乙巳填星逆行犯太微乙丑辰時月在危宿奄太白占曰天下民靡散三月丁未月犯填星在軫占曰爲大喪五月壬寅月犯太微庚戌月犯建星占曰大臣相譖辛亥月犯牽牛宿占曰國有憂五年正月北中郎將郝曇薨五月穆帝崩哀帝立大赦賜爵禘后失勢七月慕容恪攻冀州刺史呂護於野王拔之護奔滎陽是時桓溫以大衆次宛聞護敗乃退升平五年六月癸酉月奄氐東北星占曰大將當之九月乙酉奄畢占曰有邊兵十月丁卯熒惑犯歲星在營室占曰大臣有匿謀一曰衛地有兵丁未月犯畢赤星占曰下犯上又曰有邊兵八月

范汪廢隆和元年慕容煒遣傅末波寇河陰陳祐危逼

晉哀帝興寧元年八月星孛大角亢入天市按占爲兵喪三年正月皇后王氏崩二月哀帝崩三月慕容恪攻洛陽沈勁等戰死

興寧元年十月丙戌月奄太白在須女占曰天下民靡散一曰災在揚州三年洛陽沒其後桓溫傾揚州資實討鮮卑敗績死亡大半及征袁真淮南殘破後氏及東胡侵逼兵役無已

興寧三年正月乙卯月奄歲星在參益州分也六月鎮西將軍益州刺史周撫薨十月梁州刺史司馬勲入益州以叛朱序率衆助刺史周楚討平之

興寧三年七月庚戌月犯南斗占曰女主憂歲星犯輿鬼占曰人君憂十月太白晝見在亢占曰亢爲朝廷有兵喪爲臣彊哀帝是年二月崩其災皆在海西也明年五月皇后庾氏崩



晉海西太和元年二月丙子月奄熒惑在參占曰爲內亂一曰參  
魏地二年正月太白入昴五年慕容暉爲苻堅所滅司冀幽并四  
州並屬氏

太和二年八月戊午太白犯歲星在太微三年六月甲寅太白奄  
熒惑在太微端門中六年海西公廢

太和四年二月客星見紫宮西垣至七月乃滅占曰客星守紫宮  
臣殺主閏月乙亥月暈軫復有白暈貫月北暈斗柄三星占曰王  
者惡之六年桓溫廢帝

太和四年十月壬申有大流星西下聲如雷按占流星爲貴使星  
大者使大明年遣使免袁真爲庶人桓溫征壽春真病死息瑾代  
立求救於苻堅溫破氏軍六年壽春城陷聲如雷將士怒之象也  
太和六年閏月熒惑守太微端門占曰天子亡國又曰諸侯三公

謀其上一曰有斬臣辛卯月犯心大星占曰王者惡之十一月桓  
溫廢帝并奏誅武陵王簡文不許溫乃徙之新安



宋書卷二十四

志第十四終

宋書卷二十五

志第十五

天文三

晉簡文咸安元年十二月辛卯熒惑逆行入太微二年三月猶不  
 退占曰國不安有憂是時帝有桓溫之逼恒懷憂慘七月帝崩  
 咸安二年正月巳酉歲星犯填星在須女占曰為內亂五月歲星  
 形色如太白占曰進退如度姦邪息變色亂行主無福歲星囚於  
 仲夏當細小而明此其失常也又為臣強六月太白晝見在七星  
 乙酉太白犯輿鬼占曰國有憂七月帝疾甚詔桓溫曰少子可輔  
 者輔之如不可君自取之賴侍中王坦之毀手詔改使如王導輔  
 政故事溫聞之大怒將誅坦之等內亂之應也是月帝崩  
 咸安二年五月丁未太白犯天關占曰兵起六月庾希入京城十

藝文志卷之四十五

藝文志卷之四十五



一月盧悚入宮並誅滅

晉孝武寧康元年正月戊申月奄心大星按占災在王者則在豫州一曰主命惡之三月丙午月奄南斗五星占曰大臣有憂憂死亡一曰將軍死七月桓溫薨

寧康二年正月丁巳有星孛于女虛經氏亢角軫翼張九月丁丑有星孛于天市十一月癸酉太白奄熒惑在營室占曰金火合爲爍此災皆爲兵喪太元元年五月氏賊苻堅伐涼州七月氏破涼州虜張天錫十一月桓沖發三州軍軍淮泗桓豁亦遣軍備境上寧康二年閏月己未月奄牽牛南星占曰左將軍死三年五月北中郎將王坦之薨

寧康三年六月辛卯太白犯東井占曰秦地有兵九月戊申熒惑奄左執法占曰執法者死太元元年苻堅破涼州十月尚書令王

彪之卒

晉孝武太元元年四月丙戌熒惑犯南斗第三星丙申又奄第四星占曰兵大起中國饑一曰有赦八月癸酉太白晝見在氏氏亢州分野九月熒惑犯哭泣星遂入羽林占曰天子有哭泣事中軍兵起十一月己未月奄左角占曰天子有兵一曰國有憂三年六月熒惑守羽林占曰禁兵大起九月壬午太白晝見在角亢州分元年五月大赦三年八月氏賊韋鍾入漢中東下苻融寇樊鄧慕容煒圍襄陽氏兗州刺史彭超圍彭城四年二月襄陽城陷賊獲朱序彭超捨彭城獲吉挹彭超等聚廣陵三河衆五萬於是征虜謝石次除中右衛毛安之游擊河間王曇之等次堂邑發丹陽民丁使尹張涉屯衛京都六月兗州刺史謝玄討賊大破之餘燼皆走是時中外連兵比年荒儉是年又發揚州萬人戍夏口



太元四年十一月丁巳太白犯哭星占曰天子有哭泣事五年七月丙子辰星犯軒轅占曰女主當之九月癸未皇后王氏崩太元六年十月乙卯有奔星東南經翼軫聲如雷星說曰光迹相連曰流絕迹而去曰奔按占楚地有兵一曰軍破民流十二月氏荊州刺史梁成襄陽太守閻震率衆伐竟陵柏石虔擊大破之生禽震斬首七千獲生萬人聲如雷將帥怒之象也七年九月朱綽擊襄陽拔將六百餘家而還

太元七年十一月太白晝見在斗占曰吳有兵喪八年四月甲子太白又晝見在參占曰魏有兵喪是月桓沖征沔漢楊亮伐蜀並拔城略地八月苻堅自將號百萬九月攻沒壽陽十月劉牢之破堅將梁成斬之殺獲萬餘人謝玄等又破堅於淝水斬其弟融堅大衆奔潰九年六月皇太后褚氏崩八月謝玄出屯彭城經略中州十年八月苻堅爲其將姚萇所殺

太元十年十二月己丑太白犯歲星占曰爲兵饑是時河朔未一兵連在外冬大饑

太元十一年二月戊申太白晝見在東井占曰秦有兵臣彊六月甲午歲星晝見在胃占曰魯有兵臣彊十二年慕容垂寇東阿翟遼寇河上姚萇假號安定苻登自立隴上呂光竊據涼土

太元十一年三月客星在南斗至六月乃沒占曰有兵一曰有赦是後司雍竟冀常有兵役十二年正月大赦八月又赦

太元十二年二月戊寅熒惑入月占曰有亂臣死相若有戮者一曰女親爲敗天下亂是時琅邪王輔政王妃從兄國寶以姻昵受寵又陳郡人袁悅昧私苟進交遘主相扇揚朋黨十三年帝殺悅於是主相有隙亂階興矣



太元十二年十月庚午太白晝見在斗十三年閏月戊辰天狗東北下有聲十二月戊子辰星入月在危占曰賊臣欲殺主不出三年必有內惡是月熒惑在角亢形色猛盛占曰熒惑大其常吏且棄其法諸侯亂其政自是後慕容垂翟遼姚萇苻登慕容永並阻兵爭疆十四年正月彭城妖賊又稱號於皇丘劉牢之破滅之三月張道破合鄉圍大山向欽之擊走之是年翟遼又攻沒滎陽侵略陳項于時政事多弊治道遲矣

太元十四年十二月熒惑入羽林乙未月犯歲星占並同上十五年翟遼陸掠司寇衆軍累討弗克鮮卑又跨略并冀七月旱八月諸郡大水兗州又蝗

太元十五年七月壬申有星孛于北河戒經太微三台文昌入北斗長十餘丈八月戊戌入紫微乃滅占曰北河戒一名胡門胡門

有兵喪掃太微入紫微王者當之三台爲三公文昌爲將相將相三公有災入北斗疆國發兵諸侯爭權大夫憂十一月太白入羽林占曰天子爲軍自守有反臣二十一年九月孝武帝崩隆安元年王恭殷仲堪桓玄等並發兵表誅王國寶朝廷從而殺之并斬其從弟緒司馬道子由是失勢禍亂成矣

太元十六年十一月癸巳月奄心前星占曰太子憂是時太子常有篤疾

太元十七年九月丁丑歲星熒惑填星同在亢氏占曰三星合是謂驚位絕行內外有兵喪與饑改立王公

太元十八年正月乙酉熒惑入月占曰憂在宮中非賊乃盜也一日有亂臣若有戮者二十一年九月帝暴崩內殿兆庶宣言夫人張氏潛行大逆于時朝政闇緩不加顯戮但默責而已又王國寶



邪狡卒伏其辜

太元十八年二月有客星在尾中至九月乃滅占曰燕有兵喪十九年四月己巳月奄歲星在尾占曰爲飢燕國亡二十年慕容垂遣息寶伐什圭爲圭所破死者數萬人二十年垂死國遂衰亡太元十九年十月癸丑太白犯歲星在斗占曰爲饑爲內兵斗吳越分至隆安元年王恭等舉兵顯王國寶之罪朝廷赦之是後連歲水旱民饑

太元二十年六月熒惑入天囿占曰天下饑七月丁亥太白入太微占曰太白入太微國有憂晝見爲兵喪九月有蓬星如粉絮東南行歷女虛至哭星占曰蓬星見不出三年必有亂臣戮死於市十二月己巳月犯樞閉及東西咸占曰樞閉司心腸喉舌東西咸主陰謀是時王國寶交構朝政二十一年九月帝崩隆安元年王

恭等舉兵而朝廷戮王國寶王緒又連歲水旱兼三方勦衆民飢

太元二十一年三月太白連晝見在羽林占曰有強臣有兵喪中軍兵起四月壬午太白入天囿占曰爲饑六月歲星犯哭星占曰有哭泣事是年九月孝武帝崩隆安元年王恭舉兵脅朝廷於是中外戒嚴戮王國寶以謝之

晉安帝隆安元年正月癸亥熒惑犯哭星占曰有哭事二月歲星熒惑皆入羽林占曰軍兵起四月丁丑太白晝見在東井秦有兵喪是月王恭舉兵內外戒嚴尋殺王國寶等六月羌賊攻洛陽郗恢遣兵救之姚萇死子略代立什圭自號於中山

隆安元年六月庚午月奄太白在太微端門外占曰國受兵乙酉月奄歲星在東壁占曰爲饑衛地有兵八月熒惑守井鉞占曰大臣有誅二年六月戊辰攝提移戾失常歲星晝見在胃胃兗州分



是年六月郝恢遣鄧啟方等以萬人伐虜於滑臺滑臺衛地也啟方等敗而還九月王恭庾楷殷仲堪桓玄等並舉兵表誅王愉司馬尚之兄弟於是內外戒嚴大發民衆仲堪軍至尋陽禽江州刺史王愉楷將段方攻尚之於楊湖爲所敗方死王恭司馬劉牢之反恭恭敗桓玄至白石亦奔退仲堪還江陵三年冬荊州刺史殷仲堪爲桓玄所殺

隆安二年閏月太白晝見在羽林丁丑月犯東上相辛未辰星犯軒轅星占悉同上是年正月楊佺期破郝恢奪其任殷仲堪又殺之六月鮮卑攻沒青州十月羌賊攻沒洛陽桓玄破荆雍殺殷仲堪楊佺期孫恩聚衆攻沒會稽殺內史王凝之劉牢之東討走之四年七月太皇太后李氏崩

隆安四年正月乙亥月犯填星在牽牛占曰吳越有兵喪女主憂

二月巳丑有星孛于奎長三丈上至閣道紫宮西蕃入斗魁至三台太微帝座端門占曰慧拂天子廷閣易主之象經三台入北斗占同上條六月巳未月又犯填星在牽牛辛酉又犯哭星十月奄歲星在斗河占曰爲饑十二月戊寅有星孛于貫索天市天津占曰貴臣獄死內外有兵喪天津爲賊斷王道天下不通十二月太白在斗晝見至五年正月乙卯按占災在吳越三月甲寅流星赤色衆多西行經牽牛虛危天津閣道貫太微紫宮占曰星者庶民類衆多西流之象徑行天子庭主弱臣彊諸侯兵不制七月癸亥大角星散搖五色占曰王者流散丁卯月犯天關占曰王者憂九月庚子熒惑犯少微又守之占曰處士誅十月戊子月犯東蕃次相四年五月孫恩復破會稽殺內史謝琰遣高雅之等討之七月太皇太后李氏崩十月妖賊大破高雅之於餘姚死者十七八五



年二月孫恩攻句章高祖拒之五月吳郡內史袁山松出戰爲所  
殺死者數千人六月孫恩至京口高祖擊破之恩軍蒲州於是內  
外戒嚴營陣屯守柵斷淮 恩遣別將攻廣陵殺三千餘人恩遁  
據郁州是月高祖又追破之九月桓玄表至逆旨陵上十月司馬  
元顯大治水軍將以伐玄元興元年正月桓玄東下是月孫恩在  
臨海人衆餓死散亡恩亦投水死盧循自稱征虜將軍領其餘衆  
略有永嘉晉安之地二月帝戎服遣西軍丁卯桓玄至姑熟破歷  
陽司馬尚之見殺劉牢之降于玄三月玄剋京都殺大司馬元顯  
放太傅道子七月大饑人相食浙江東餓死流亡十六七吳郡吳  
興戶口減半又流奔<sup>缺</sup>西者萬計十月桓玄遣將擊劉軌破走奔  
州四年玄遂篡位遷帝尋陽

晉安帝元興元年二月戊子太白犯五諸侯因晝見四月辛丑月

奄辰星七月戊寅熒惑在東井熒惑犯輿鬼積屍占並同上八月  
庚子太白犯歲星在上將東南占曰楚兵飢一曰災在上將丙寅  
太白奄右執法九月癸未太白犯進賢占曰賢者誅十月客星色  
白如粉絮在太微西至十二月入太微占曰兵入天子庭二年二  
月歲星犯西上將六月甲辰奄斗第四星占曰大臣誅不出三年  
八月癸丑太白犯房北第二星九月巳丑歲星犯進賢熒惑犯西  
上將十月甲戌太白犯泣星十一月丁丑熒惑犯填星辛巳月犯  
熒惑十二月乙巳月奄軒轅第二星占悉同上元年冬索頭破羗  
軍二年十二月桓玄篡位放遷帝后於尋陽以永安何皇后爲零  
陵君三年二月高祖盡誅桓氏  
元興三年正月戊戌熒惑逆行犯太微西上相占曰天子戰於野  
上相死二月甲辰月奄歲星於左角占曰天下兵起丙辰熒惑逆



行在左執法西北占曰執法者憂四月甲午月奄軒轅第二星填  
星入羽林十二月熒惑太白皆犯羽林占同上是年二月丙辰高  
祖殺桓脩等三月巳未破走桓玄遣軍西討辛巳誅左僕射王愉  
及子荊州刺史綏桓玄劫帝如江陵五月玄下至崢嶸洲義軍破  
滅之桓振又攻沒江陵幽劫天子明年正月衆軍攻之振走乘輿  
乃旋七月永安何皇后崩三月桓振又襲江陵荊州刺史司馬休  
之敗走是月劉懷肅擊振滅之其年二月巴西人譙縱殺益州刺  
史毛璩及璩弟西夷校尉瑾跨有西土自號蜀王

晉安帝義熙元年三月壬辰月奄左執法占同上丁酉月奄心前  
星占曰豫州有災太白犯東井占曰秦有兵四月巳卯月犯填星  
在東壁占曰其地亡國一曰貴人死七月庚辰太白比晝見在翼  
軫占曰爲臣強荊州有兵喪巳未月奄填星在東壁占曰其國以

伐亡一曰民流八月丁巳月犯斗第一星占曰天下有兵一曰大  
臣憂按江左來南斗有災則吳越會稽丹陽豫章廬江各隨其星  
應之淮南失土殆不占耳史闕其說故不列焉九月戊子熒惑犯  
少微占曰處士誅庚寅熒惑犯右執法癸卯熒惑犯左執法占並  
同上十月丁巳月奄填星營室占同七月十一月丙戌太白奄鉤  
鈴占曰喉舌臣憂十二月巳卯歲星犯天江占曰有兵亂河津不  
通是年六月索頭寇沛土使僞豫州刺史索度真成相縣太傅長  
沙景王討破走之十一月荊州刺史魏詠之薨二年二月司馬國  
璠等攻沒弋陽四月羌伐仇池仇池公楊盛擊走之九月益州刺  
史司馬榮期爲其參軍楊承祖所害時文處茂討蜀屢有功會榮  
期死乃退三年十二月司徒揚州刺史王謐薨四年正月太保武  
陵王遵薨三月左僕射孔安國卒五年高祖討鮮卑并定舊克之



地

義熙二年二月己丑月犯心後星占曰豫州有災四月癸丑月犯太微西將己未月犯房南第二星己丑歲星犯天江占悉同上五月癸未月犯左角占曰左將軍死天下有兵壬寅熒惑犯氏占曰氏爲宿宮人主憂六月庚午熒惑犯房北第二星八月癸亥熒惑犯斗第五星丁巳犯建星九月壬午熒惑犯哭星又犯泣星占悉同上十二月丙午月奄太白在危占曰齊亡國一曰疆國君死丁未熒惑太白皆入羽林是年二月甲戌司馬國璠等攻沒弋陽三年正月鮮卑寇北徐州至下邳八月遣劉敬宣伐蜀十二月司徒王謐薨四年正月武陵王遵薨五年鮮卑復寇淮北四月高祖大軍討之六月大戰臨朐城進圍廣固十月什圭爲其子僞清河公所殺六年二月拔廣固禽慕容超阮斬其衆三千餘人

義熙三年正月丙子太白晝見在奎二月庚寅月奄心後星占悉同上癸亥熒惑填星太白辰星聚於奎婁從填星也其說見上九年五月己丑太白晝見在參占曰益州有兵喪臣彊八月辛卯熒惑犯辰星翼占曰天下兵起八月己卯太白奄熒惑又犯執法占曰奄熒惑有大兵辛卯熒惑犯左執法九月壬子熒惑犯進賢是年正月丁巳鮮卑寇北徐至下邳八月劉敬宣伐蜀不克而旋四年三月左僕射孔安國卒七月司馬叔璠等攻沒鄒山魯郡太守徐邕破走之姚略遣衆征佛佛大爲所破五年高祖討鮮卑六年三月妖賊徐道覆殺鎮南將軍江州刺史何無忌於豫章四月妖賊盧循寇湘中巴陵五月丙子循道覆敗撫軍將軍豫州刺史劉毅於桑落州毅僅以身免丁丑循等至蔡洲遣別將焚京口庚辰賊攻焚杏浦杏浦戍將距戰不利高祖遣軍渡淮擊大破之司馬



國璠寇碭山竺夔討破之七月妖賊南走據尋陽高祖遣劉鍾等  
追之八月孫季高乘海伐廣州謙之以蜀衆聚枝江盧循將苟林  
略華容相去百里臨川烈武王討謙之又討林林退走鄱陽太守  
虞丘延破賊別帥於上饒九月烈武王使劉遵擊苟林於巴陵斬  
之桓道兒率蔡猛向大薄又遣劉基討之斬猛十月高祖以舟師  
南征是時徐道覆率二萬餘人攻荊州烈武王距之戰於江津大  
破之梟殄其十八九道覆戰船走十一月劉鍾破賊軍於南陵癸  
丑益州刺史鮑陋卒于白帝譙道福攻沒其衆庚戌孫季高襲廣  
州剋之十二月高祖在大雷與賊交戰大破之賊走左里進擊又  
破死者十八九賊還廣州劉蕃等追之七年二月蕃拔始興城斬  
徐道覆盧循還番禺攻圍孫季高不能剋走交州交州刺史杜慧  
度斬之四月到彥之攻譙道福於白帝拔之

義熙四年正月庚子熒惑犯天江占同上五月丁未月奄斗第二  
星占同上壬子填星犯天廩占曰天下饑倉粟少六月己丑太白  
犯太微西上將巳卯又犯左執法十月戊子熒惑入羽林占悉同  
上五年高祖討鮮卑六年左僕射孟昶仰藥卒是後南北軍旅運  
轉不息

義熙五年二月甲子月犯昴占曰胡不安天子破匈奴四月甲戌  
熒惑犯辰星在東井占同三年五月戊戌歲星入羽林占同上九  
月壬寅月犯昴占同二年十月熒惑犯氐占同二年閏月丁酉月  
犯昴占同二月辛亥熒惑犯鉤鈴占同元年十二月辛丑太白犯  
歲星在奎占曰大兵起魯有兵巳酉月奄心大星占曰王者惡之  
是年四月高祖討鮮卑什圭爲其子所殺十一月西虜攻安定姚  
略自以大衆救之六年二月鮮卑滅皆胡不安之應也是時鮮卑



跨魯地又魯有兵之應也五月盧循逼郊甸宮衛被甲

義熙六年三月丁卯月奄房南第二星占曰災在次相巳巳又奄斗第五星占曰斗主兵兵起一曰將軍死太白犯五諸侯占曰諸侯有誅五月甲子月奄斗第五星占同三月巳亥月奄昴占曰國有憂一曰有白衣之會六月巳丑月犯房南第二星甲午太白晝見占並同上七月巳亥月犯輿鬼占曰國有憂一曰秦有兵八月壬午太白犯軒轅大星甲申月犯心前星災在豫州丙戌月犯斗第五星占悉同上五月丁亥月奄牛宿南星占曰天下有大誅乙未太白犯少微丙午太白在少微而晝見九月甲寅太白犯左執法丁丑填星犯畢占曰有邊兵是年三月始興太守徐道覆反江州刺史何無忌討之大敗於豫章無忌死之四月盧循寇湘中沒巴陵五月循等大破豫州刺史劉毅毅僅以身免循眾逼京畿是

月左僕射孟昶懼王威不振仰藥自殺七年二月劉蕃梟徐道覆首杜慧度斬盧循並傳首京都八年六月臨川烈武王道規薨時爲豫州八月皇后王氏崩九月兗州刺史劉蕃尚書僕射謝混伏誅高祖西討劉毅斬之十二月遣益州刺史朱齡石伐蜀九年諸葛長民伏誅林邑王范胡達將萬餘人寇九真九真太守杜慧期距破之七月朱齡石滅蜀

義熙七年四月辛丑熒惑入輿鬼占曰秦有兵一曰雍州有災六月太白晝見在翼占同元年巳亥填星犯天關占曰臣謀主庚子月犯歲星在畢占曰有邊兵且飢七月丁卯歲星在參占曰歲填合爲內亂一曰益州戰不勝亡地五虹見東方占曰天子黜聖人出八月乙未月犯歲星在參占曰益州兵飢太白犯房南第二星十一月丙午太白犯哭泣星占悉同上七月朱齡石剋蜀蜀民尋



又反又討滅之八年誅劉蕃謝混滅劉毅皇后王氏崩九年誅諸葛長民十一年討荊州刺史司馬休之雍州刺史魯宗之破之  
義熙八年正月庚戌月犯歲星在畢占同上七月癸亥月奄房北第二星占同上甲申太白犯填星在東井占曰秦有大兵巳未月犯井鉞八月戊申月犯泣星十月辛亥月奄天闕占曰有兵十月丁丑填星犯東井占曰大人憂十二月癸卯填星犯井鉞是年八月皇后王氏崩九月誅劉蕃謝混滅劉毅九年三月誅諸葛長民西虜攻羌安定成剋之十二月朱齡石伐蜀九年七月朱齡石滅蜀義熙九年二月丙午熒惑填星皆犯東井占曰秦有兵壬辰歲星熒惑填星太白聚于東井從歲星也熒惑入輿鬼太白犯南河初義熙三年四星聚奎婁徐州分是時慕容超僭號於齊侵略徐兗連歲寇抄至于淮泗姚興譙縱僭偽秦蜀盧循木末南北交侵

五年高祖北殄鮮卑是四星聚奎之應也九年又聚東井東井秦分十三年高祖定關中又其應也而縱循群凶之徒皆已剪滅於是天人歸望建國舊徐元熙二年受終納禪皆其徵也星傳曰四星若合是謂太陽其國兵喪並起君子憂小人流五星若合是謂易行有德受慶攻立王者奄有四方無德受罰離其國家滅其宗廟今按遺文所存五星聚者有三周漢以王齊以霸周將伐殷五星聚房齊桓將霸五星聚漢高入秦五星聚東井齊則永終侯伯卒無更紀之事是則五星聚有不易行者矣四星聚者有九漢光武晉元帝並中興而魏宋並更紀是則四星聚有以易行者矣昔漢平帝元始四年四星聚柳張各五日柳張三河分後有王莽赤眉之亂而光武興復於洛晉懷帝永嘉六年四星聚牛女後有劉聰石勒之亂而元皇興復揚土漢獻帝初平元年四星聚心又聚箕尾心豫州分後有董卓李傕暴亂黃



巾黑山熾擾而魏武迎帝都許遂以克豫定是其應也一曰心爲  
天王大兵升殿天下大亂之兆也韓馥以爲尾箕燕興之祥故奉  
幽州牧劉虞虞既距之又尋滅亡固已非矣尾爲燕又爲吳此非  
公孫度則孫權也度偏據僻陋然亦郊祀備物皆爲改漢矣建安  
二十二年四星又聚二十五年而魏文受禪此爲四星三聚而易  
行矣蜀臣亦引後聚爲劉備之應按太元十九年義熙三年九月  
四星各一聚而宋有天下與魏同也魚豢云五星聚冀方而魏有  
天下熒惑入輿鬼占曰兵喪太白犯南河占曰兵起後皆有應  
五月壬辰太白犯右執法晝見占同上七月庚午月奄鉤鈴占曰  
喉舌臣憂九月庚午歲星犯軒轅大星巳丑月犯左角十年正月  
丁卯月犯畢占曰將相有以家坐罪者二月巳酉月犯房北星五  
月壬寅月犯牽牛南星乙丑歲星犯軒轅大星占悉同上六月丙

申月奄氏占曰將死之國有誅者七月庚辰月犯天關占曰兵起  
熒惑犯井鉞填犯輿鬼遂守之占曰大人憂宗廟改八月丁酉月  
奄牽牛南星占同上九月填星犯輿鬼占曰人主憂丁巳太白入  
羽林十二月巳酉月犯西咸占曰有陰謀十一年二月丁巳月入  
畢占曰天下兵起一曰有邊兵巳卯填星入輿鬼閏月丙午填星  
又入輿鬼占曰爲旱爲疫爲亂臣五月甲申彗星出天市掃帝座  
在房心房心宋之分野按占得彗柄者興除舊布新宋興之象癸  
卯熒惑從行入太微甲辰犯右執法六月巳未太白犯東井占曰  
秦有兵戊寅犯輿鬼占曰國有憂七月辛丑月犯畢占同上八月  
壬子月犯氏占同上庚申太白從行從右掖門入太微丁卯奄左  
執法十一月癸亥月入畢占同上乙未月入輿鬼而暈占曰主憂  
財寶出一曰暈有赦十二年五月甲申月犯歲星在左角占曰爲



飢留房心之間宋之分野與武王伐紂同得歲者王于時晉始封高祖爲宋公六月壬子太白從行入太微右掖門巳巳月犯畢占同上七月月犯牛宿占曰天下有大誅十月丙戌月入畢占同上十三年五月丙子月犯軒轅丁亥犯牽牛癸巳熒惑犯右執法八月巳酉月犯牽牛丁卯月犯太微占曰人君憂九月壬辰熒惑犯軒轅十月戊申月犯畢占悉同上月犯箕占曰國有憂甲寅月犯畢占同上乙卯填星犯太微留積七十餘日占曰亡君之戒壬戌月犯太微占同上十一月月於太微奄填星占曰王者惡之十四年三月癸丑太白犯五諸侯占同上四月壬申月犯填星於張占曰天下有大喪五月庚子月犯太微占同上壬子有星孛于北斗魁中占曰有聖人受命七月甲辰熒惑犯輿鬼占曰秦有兵丁巳月犯東井占曰軍將死癸亥彗星出太微西柄起上相星下芒漸

長至十餘丈進歸北斗紫微中台占曰彗出太微社稷亡天下易王入北斗紫微帝宮空一曰天下得聖主八月甲子太白犯軒轅癸酉填星入太微犯右執法因留太微中積二百餘日乃去占曰填星守太微亡君之戒有徙王九月乙未太白入太微犯左執法丁巳月入太微占曰大人憂十月癸巳熒惑入太微犯西蕃上將仍從行至左掖門內留二十日乃逆行元年三月五日出西蕃上將西三尺許又從還入太微時填星在太微繞填星成鉤巳其年四月二十七日丙戌從端門出占曰熒惑與填星鉤巳天下更紀甲申月入太微占同上十一年正月高祖討司馬休之魯宗之等潰奔長安五月林邑寇交州交州刺史杜慧度距戰于九真大爲所敗十三年七月高祖伐羌十月前驅定陝洛十三年三月索頭大衆緣河爲寇高祖討之奔退其別帥托跋嵩交戰又大破之嵩



衆殲焉進復攻關八月擒姚泓司克秦雖悉平索頭兇懼十四年  
高祖還彭城受宋公十一月左僕射前將軍劉穆之卒明年西虜  
寇長安離州刺史朱齡石諸軍陷沒官軍舍而東十二月安帝崩  
母弟琅邪王踐阼是曰恭帝

晉恭帝元熙元年正月丙午三月壬寅月犯太微占悉同上乙卯  
辰星犯軒轅六月庚辰太白犯太微七月月犯歲星巳卯月犯太  
微太白晝見占悉同上自義熙元年至是太白經天者九日有蝕  
從上始華代更王臣民失君之象也是夜太白犯哭星十二月丁  
巳月太白俱入羽林二年二月庚午填星犯太微占悉同上元年  
十月高祖受宋王二年六月晉帝遜位高祖入宮

宋書卷二十五 志第十五 終

西漢書卷二十五 氏雷宿南市

宋書卷二十六

西漢書卷二十六 氏雷宿南市

志第十六

天文四

宋武帝永初元年十月辛丑熒惑犯進賢占曰進賢官誅十一月  
乙卯熒惑犯填星於角占曰爲喪大人惡之一曰兵起十二月庚  
子月犯熒惑於亢占曰爲內亂一曰貴人憂角爲天門亢爲朝廷  
三年五月宮車晏駕七月太傅長沙景王道憐薨索頭攻略青司  
克三州於是禁兵大出是後司徒徐羨之尚書令傅亮領軍謝晦  
等廢少帝內亂之應

永初元年十二月甲辰月犯南斗占曰大臣憂三年七月長沙王  
薨索虜寇青司二州大軍出救

永初二年六月甲申太白晝見占爲兵喪爲臣彊三年五月宮車

西漢書卷二十六 氏雷宿南市



晏駕尋遣兵出救青司其後徐羨之等秉權臣彊之應也

永初二年六月乙酉熒惑犯氏乙巳犯房占曰氏爲宿宮房爲明堂人主有憂房又爲將相將相有憂氏房又兗豫分三年五月宮車晏駕七月長沙王薨王領兗州也景平元年廬陵王義真廢王領豫州也

永初二年十月太白犯填星於亢兗州分又爲鄭占曰大星有大兵金土合爲內兵三年索頭攻略青冀兗三州禁兵大出兗州失守虎牢沒

永初三年正月丁卯月犯南斗占同元年一曰女主當之二月辛卯有星孛于虛危向河津埽河鼓占曰爲兵喪五月宮車晏駕明年遣軍救青司二月太后蕭氏崩

永初三年二月壬辰填星犯亢占曰諸侯有失國者民多流亡一

曰廷臣爲亂亢兗州分又爲鄭其年索頭攻圍司兗兗州刺史徐琰委守奔敗司州刺史毛德祖距守陷沒緣河吏民多被侵略

永初三年三月壬戌月犯南斗占同正月五月丙午犯軒轅占曰女主當之六月辛巳月犯房占曰將相有憂豫州有災癸巳犯歲星於昴占曰趙魏兵飢其年虜攻略青兗司三州廬陵王義真廢王領豫州也二月太后蕭氏崩元嘉三年司徒徐羨之等伏誅

永初三年九月癸卯熒惑經太微犯左執法巳未犯右執法占悉同上十月癸酉太白犯南斗占曰國有兵事大臣有反者辛巳熒惑犯進賢占曰進賢官誅明年師出救青司景平二年徐羨之等廢帝徙王元嘉三年羨之及傅亮謝晦悉誅

永初三年十一月戊午有星孛於室壁占曰爲兵喪明年兵救青司二月太后蕭氏崩營室內宮象也



永初三年十一月癸亥月犯亢氏占曰國有憂十一月戊戌熒惑犯房房爲明堂王者惡之一曰將相憂景平二年羨之等廢帝因害之元嘉三年羨之等伏誅

少帝景平元年正月乙卯有星孛于東壁南白色長二丈餘拂天苑二十日滅二月太后蕭氏崩十月戊午有星孛于氏北尾長四丈西北指貫攝提向大角東行日長六七尺十餘日滅明年五月羨之等廢帝

文帝元嘉元年十月熒惑犯心元嘉二年正月甲寅夜天東南有黑氣廣一丈長十餘丈元嘉六年五月太白晝見經天元嘉七年三月太白犯歲星於奎六月熒惑犯東井輿鬼入軒轅月犯歲星十一月癸未西南有氣上下赤中央黑廣三尺長三十餘丈狀如旌旗十二月丙戌有流星頭如鬣尾長二十餘丈大如數十斛船

赤色有光照人面從西行經奎北大星南過至東壁止其年索虜寇青司殺刺史掠居民遣征南大將軍檀道濟討伐經歲乃歸

元嘉八年四月辛未太白晝見在胃五月犯天關東井六月庚子熒惑入東井七月壬戌夜白虹見東方丁丑太白犯上將八月癸未太白入太微右掖門內犯左執法乙未熒惑犯積尸九月丙寅流星大如斗赤色發太微西蕃北行未至北斗沒餘光長三丈許十月丙辰金土相犯在須女月奄天關東井十二月月犯房鉤鈴十年仇池氏寇漢中梁州失戍

元嘉九年正月庚午熒惑入輿鬼三月月犯軒轅四月犯左角歲星入羽林月犯房鉤鈴巳丑太白入積尸五月犯軒轅月奄南斗第六星辛酉熒惑入太微右掖門犯右執法七月丙午月蝕左角八月癸未太白犯心前星乙酉犯心明堂星元嘉十年十月有流



星大如彗尾長二十餘丈元嘉十一年二月庚子月犯畢入畢口而出因暈昴畢西及五車東及參三月丙辰太白晝見在參閏月戊寅太白犯五諸侯巳丑月入東井犯太白于時司徒彭城王義康專權

元嘉十二年五月壬戌月犯右執法七月壬戌熒惑犯積尸奄上將十月丙午月犯右執法十二月甲申太白犯羽林十七年上將執法皆被誅

元嘉十三年正月庚午月犯熒惑二月月犯太微東蕃第一星十一月辛亥歲星犯積尸十二月戊子熒惑入羽林後年廢大將軍彭城王義康及其黨與凡所收掩皆羽林兵出

元嘉十四年正月有星晡前晝見東北維在井左右黃赤色大如橘月犯東井四月丁未太白犯輿鬼五月丙午太白晝見在太微

七月辛卯歲星入軒轅八月庚申熒惑犯上將九月丙戌熒惑犯左執法其後皇后袁氏崩丹陽尹劉湛誅尚書僕射殷景仁薨

元嘉十五年四月巳卯月犯氏十月壬戌流星大如鴨子出文昌入紫宮聲如雷十一月癸未熒惑入羽林丁未月犯東井鉞星其後誅丹陽尹劉湛等

元嘉十六年二月歲星逆行犯左執法五月丁卯太白晝見胃昴間月入羽林太白犯畢歲星左執法七月月會填星八月太白犯軒轅明年皇后袁氏崩熒惑犯太微西上將太白晝見在翼九月熒惑同入太微相犯太白犯左執法熒惑犯右執法十月歲星熒惑相犯在亢十一月熒惑犯房北第一星明年大將軍義康出徙豫章誅其黨與尚書僕射楊州刺史殷景仁薨

元嘉十九年九月客星見北斗漸爲彗星至天苑末滅



元嘉二十年二月二十四日乙未有流星大如桃出天津入紫宮須臾有細流星或五或三相續又有一大流星從紫宮出入北斗魁須臾又一大流星出貫索中經天市垣諸流星並向北行至曉不可稱數流星占並云天子之使又曰庶民惟星星流民散之象至二十七年索虜殘破青冀徐兗南兗豫六州民死大半

元嘉二十二年二月金火木合東井四月月犯心太白入軒轅七月太白晝見其冬太子詹事范晔謀反伏誅

元嘉二十三年正月金火相爍其月索虜寇青州驅略民戶

元嘉二十四年正月月犯心大星天星並西流多細大不過如雞子尾有長短當有數百至旦日光定乃止有入北斗紫宮者占流星群趨所之者兵聚其下有大急又占衆星並流將軍並舉兵隨星所之以應天氣又占流星入紫宮有喪水旱不調又占流星入

北斗大臣有繫者又占流星爲民大星大臣流小星小民流四月太白晝見八月征北大將軍衡陽王義季薨豫章民胡誕世率其宗族破郡縣殺太守及縣令

元嘉二十五年正月火水入羽林月犯歲星太白晝見經天元嘉二十六年十月彗星入太微十一月白氣貫北斗二十七年夏太白晝見經天九月太白犯歲星十月熒惑入太微元嘉二十八年五月彗星見卷舌入太微逼帝座犯上相拂屏出端門滅翼軫翼軫荆州分太白晝見犯哭星三十年太子巫蠱呪詛事覺遂殺害朝臣孝建元年荆江二州反皆夷滅卷舌呪詛之象彗之所起是其應也

元嘉二十九年正月太白晝見經天明年東宮弒逆

孝武孝建元年二月有流星大如月西行其年豫州刺史魯爽反



誅

孝建元年九月壬寅熒惑犯左執法尚書左僕射建平王宏表解職不許

孝建元年十月乙丑熒惑犯進賢星吏部尚書謝莊表解職

孝建二年五月乙未熒惑入南斗十月甲辰又入南斗大明元年夏京師疾疫

孝建三年四月戊戌太白犯輿鬼占曰民多疾明年夏京邑疫疾

孝建三年八月甲午太白入心占曰後九年大飢至大明八年東土大飢民死十二三

大明元年三月癸亥太白在奎南犯歲星占曰有滅諸侯三年司空竟陵王誕反誅

大明元年六月丙申月在東壁掩熒惑占曰將軍有憂期不出三

年至三年司空竟陵王誕反

大明二年三月辛未熒惑入東井四月己亥熒惑在東井犯北軒轅第二星并雍州分其年四月海陵王休茂為雍州刺史五年休茂反誅

大明二年七月己巳月掩軒轅第二星十月辛卯月掩軒轅十一月丙戌月又掩軒轅軒轅女主時民間喧言人主帷薄不脩

大明二年十一月庚戌熒惑犯房及鉤鈴壬子熒惑又犯鉤鈴占曰有兵其年索虜寇歷下遣羽林軍討破之

大明三年春正月夜通天薄雲四方生赤氣長三四尺乍沒乍見尋皆消滅占名隧星一曰刀星天下有兵戰鬪流血月入太微犯次將占曰有反臣死將誅三月月在房犯鉤鈴因蝕占曰人主惡之將軍死三月土守牽牛占曰大人憂疾兵起大赦姦臣賊子謀



欲殺主四月犯五諸侯占曰諸侯誅金水合西方占曰兵起五月  
歲星犯東井鉞占曰斧鉞用大臣誅六月月入南斗占曰大臣大  
將軍誅南兗州刺史竟陵王誕尋據廣陵反遣車騎大將軍沈慶  
之領羽林勁兵及豫州刺史宗慤徐州刺史劉道隆衆軍攻戰及  
屠城城內男女道俗梟斬靡遺將軍宗越偏用虐刑先剝腸決眼  
或笞面鞭腹苦酒灌創然後方加以刀鋸大兵之應也八月月犯  
太白太白犯房占曰人君有憂天子惡之熒惑守畢占曰萬民饑  
有大兵九月太白犯南斗占曰大臣有反者九月月在胃而蝕既  
又於昴犯熒惑占曰兵起女主當之人主惡之一曰女主憂國王  
死民饑十月大白犯哭星占曰人主有哭泣之聲自後六宮多喪  
公主薨亡天子舉哀相係歲大旱民饑  
大明四年正月月奄氐占曰大將死又犯房北第二星占曰有亂

臣謀其主二月有赤氣長一尺餘在太白酒帝坐北占曰兵起臣欲  
謀其君五月月入太微占曰有反臣大臣死六月大白犯井鉞占  
曰兵起斧鉞用大臣誅月犯心前星占曰有亂臣太子惡之月入  
南斗魁中占曰大人憂女主惡之七月歲星犯積尸占曰大臣誅  
十二月月犯心中央大星占曰大人憂十二月通天有雲西及東  
北並生合八所並長四尺乍沒乍見尋消盡占曰天下有兵十二  
月月犯箕東北星女主惡之明年雍州刺史海陵王休茂反太白  
犯東井雍州兵亂之應也  
大明五年正月歲星犯輿鬼積尸占曰大臣誅主有憂財寶散月  
入南斗魁中占曰大人憂天下有兵火土同在須女占曰女主惡  
之三月月奄軒轅占曰女主惡之有流星數千萬或長或短或大  
或小並西行至曉而止占曰人君惡之民流亡四月太白犯東井



北轅占曰大臣爲亂斧鉞用太白犯輿鬼占曰大臣誅斧鉞用人  
主憂六月有流星白色大如甌出王良西南行沒天市中尾長數  
十丈沒後餘光良久占曰天下亂八月熒惑入東井占曰大臣當  
之十月歲星犯太微上將星太白入亢犯南第二星占曰上將有  
憂輔臣有誅者人君惡之十月太白入氏中熒惑入井中占曰王  
者亡地大赦兵起爲飢月入太微掩西蕃上將犯歲星占曰有反  
臣死大星大如斗出柳北行尾十餘丈入紫宮沒尾後餘光良久  
乃滅占曰天下凶有兵喪天子惡之十一月掩心前星又犯大  
星占曰大人憂兵起大早十二月太白犯西建中央星占曰大臣  
相譖月犯左角占曰天子惡之後三年孝武帝文穆皇后相繼崩  
嗣主卽位一年誅滅宰輔將相虐戮朝臣禍及宗室因自受害  
大明六年正月月在張犯歲星占曰民飢流亡月犯心後星占曰

庶子惡之二月月掩左角占曰天子惡之三月熒惑入輿鬼占曰  
有兵大臣誅天下多疾疫五月月在張又入太微犯熒惑占曰國  
主不安女主憂火犯木翼占曰爲飢爲旱近臣大臣謀主有星前  
赤後白大如甌尾長十餘丈出東壁北西行沒天市啾啾有聲占  
曰其下有兵天下亂月掩昴七星占曰貴臣誅天子破匈奴胡主  
死歲星犯上將占曰輔臣誅上將憂六月月入太微犯右執法占  
曰人主不安天下大驚主不吉執法誅月犯心後星占曰庶子惡  
之七月月犯箕占曰女主惡之八月月入南斗魁中占曰大臣誅  
斧鉞用吳越有憂明年揚南徐州大旱田穀不收民流死亡自後  
三年帝后仍崩宰輔及尚書令僕誅戮索虜主死新安王兄弟受  
害司徒豫章王子尚薨羽林兵入三吳討叛逆  
大明七年正月夜通天薄雲四方合有八氣蒼白色長二三丈乍



見乍沒名刀星占曰天下有兵三月月犯心後星占曰庶子惡之  
四月火犯金在婁占曰有喪有兵大戰六月月犯箕占曰女主惡  
之太白入東井占曰大臣當之太白犯東井占曰大臣爲亂斧鉞  
用七月熒惑入東井占曰兵起大將當之月入南斗魁犯第二星  
占曰大人憂吳郡當之太白犯輿鬼占曰兵起大將誅人主憂財  
帛出八月月入哭星中間太白犯軒轅少民星占曰人主憂哭泣  
之聲民飢流亡太白入太微占曰近臣起兵國不安熒惑犯鬼太  
白犯右執法占曰大臣誅十月金水相犯占曰天下飢熒惑守軒  
轅第二星占曰宮中憂有哀十一月歲星入氏占曰諸侯人君有  
入宮者十二月月犯五車占曰天庫兵動後二年帝后崩大臣將  
相誅滅皇子被害皇太后崩四方兵起分遣諸軍推鋒外討  
大明八年正月月掩輿鬼占曰大臣誅月入南斗魁中掩第二星

占曰大人憂女主惡之二月月犯南斗第四星入魁中占曰大人  
有憂女主當之豫章受災四月月入南斗魁中犯第三星占曰大  
人有憂女主惡之丹陽當之太白入東井入太微犯執法占曰執  
法誅近臣起兵國不安六月歲星犯氏占曰歲大飢有流星大如  
五斗甌赤色有光照見人面尾長一丈餘從參北東行直下經東  
井過南河沒占曰民飢吳越有兵七月歲星入氏十月太白守房  
占曰有兵大喪月掩食房占曰有喪大飢此後國仍有大喪丹陽  
尹顏師伯豫章王子尚死明年昭太后崩四方賊起王師水陸征  
伐義興晉陵縣大戰殺傷千計

前廢帝永光元年正月丁酉太白掩牽牛牽牛趙分其月庚申月  
在虛宿犯太白虛齊地二月甲申月入南斗南斗揚州分野又爲  
貴臣三月庚子月入輿鬼犯積尸輿鬼主斬戮六月庚午熒惑入



東井東井離州分其月壬午有大流星前赤後白入紫宮

景和元年九月丁酉熒惑入軒轅在女主大星北十月熒惑入太微犯西上將十一月丁未太白犯哭星其月乙卯月犯心心爲天王其年太宰江夏王義恭尚書令柳元景尚書僕射顏師伯等並誅太尉沈慶之薨廬陵王敬先南平王敬猷南安侯敬淵並賜死廢帝殞明年會稽太守尋陽王子房廣州刺史袁曇遠離州刺史袁顛青州刺史沈文秀並反昭太后崩

明帝泰始元十二月己巳太白入羽林占曰羽林兵動乙亥白氣入紫宮占曰有喪事明年羽林兵出討昭太后崩

泰始二年正月甲午熒惑逆行在屏西南占曰有兵在中其月丙申月暈五車通畢昂占曰女主惡之其月庚子月犯輿鬼占曰將軍死其月甲寅流星從五車出至紫宮西蕃沒占曰有兵其月丙

辰黑氣貫宿占曰王侯有歸骨者三月乙未流星大小西行不可稱數至曉乃息占曰民流之象四月壬午熒惑入太微犯右執法月在丙子歲星晝見南斗度中占曰其國有軍容大敗其月巳卯竟夜有流星百餘西南行一大如甌尾長丈餘黑色從河鼓出又曰有兵其月壬午太白在月南並出東方爲犯占曰有破軍死將王者亡地七月甲午月犯心心爲宋地其月丙午月犯南斗占曰大臣誅其月乙卯熒惑犯氏氏兗州分野十月辛巳太白入氏占曰春穀貴十一月癸巳太白犯房占曰牛多死其年四方反叛內兵大出六師親戎昭太后崩大將殷孝祖爲南賊所殺尚書右僕射蔡興宗以熒惑犯右執法自解不許九月諸方反者皆平多有歸降者後失淮北四州地彭城兗州並爲虜州沒民流之驗也彭城宋分也是春穀貴民飢明年牛多疾死詔太官停宰牛



泰始三年六月甲辰月犯東井占曰軍將死熒惑犯輿鬼占曰金錢散又曰不出六十日必大赦八月癸卯天子以皇后六宮衣服金釵雜物賜北征將士明年二月護軍王玄謨薨

泰始四年六月壬寅太白犯輿鬼占曰民大疾死不收其年普天大疫

泰始五年二月丙戌月犯左角占曰三年天子惡之三月庚申月犯建星占曰易相十月壬午月犯畢占曰天子用法誅罰急貴人有死者其月丙申太白犯亢占曰收斂國兵以備北方其年冬建安王休仁解揚州桂陽王休範爲揚州揚州牧前後常宰相居之易相之驗也七年晉平王休祐建安王休仁並見殺時失淮北立戍以備防北虜後三年宮車晏駕

泰始六年正月辛巳月犯左角同前占八月壬辰熒惑犯南斗南斗吳分十一月乙亥月犯東北轅占曰大人當之又曰大臣有謀者二年殺揚州刺史王景文宮車晏駕

後廢帝元徽三年七月丙申太白入角犯歲星占曰角爲天門國將有兵事占於角大白與木星會殺軍在外破軍殺將其月丁巳太白入氐氏爲天子宿宮太白兵凶之星八月巳巳太白犯房北頭第二星占曰王失德九月癸卯太白犯南斗第三星占曰大人當之國易政十月丙戌歲星入氐占曰諸侯人君有來入宮者十一月庚戌月入太微奄屏西南星占曰貴者失勢四年七月建平王景素據京口反時廢主凶慝無度五年七月殞安成王入纂皇阼三年齊受禪

元徽四年三月乙巳朔月犯房北頭第一星進犯鍵閉星占曰有謀伏甲兵在宗廟中天子不可出宮下堂多暴事九月甲辰填星



犯太微西蕃占曰立王一日徙王又曰大人憂時廢帝出入無度卒以此殞安成王立

元徽五年正月戊申月犯南斗第五星與前同占四月丁巳熒惑犯輿鬼西北星占曰大人憂近期六十日遠期六月日又曰人君惡之其月丙子太白犯輿鬼西北星占曰大赦五月戊申太白晝見午上光明異常占曰更姓六月壬戌月犯鉤鈴星占曰有大令其月乙丑月犯南斗第四星與前同占七月廢帝殞大赦天下後二年齊受禪

順帝昇明元年八月庚申月入南斗犯第三星與前同占九月丁亥太白在翼晝見經天占曰更姓閏十二月癸卯夜月奄南斗第四星與前同占

宋書卷二十六

志第十六終

藝文志卷之二十七

宋書卷二十七

志第十七

符瑞上

夫體睿窮幾含靈獨秀謂之聖人所以能君四海而役萬物使動植之類莫不各得其所百姓仰之歡若親戚芬若椒蘭故為旗章輿服以崇之玉璽黃屋以尊之以神器之重推之於兆民之上自中智以降則萬物之為役者也性識殊品蓋有愚暴之理存焉見聖人利天下謂天下可以為利見萬物之歸聖人謂之利萬物力爭之徒至以逐鹿方之亂臣賊子所以多於世也夫龍飛九五配天光宅有受命之符天人之應易曰河出圖洛出書而聖人則之符瑞之義大矣

赫胥燧人之前無聞焉

藝文志卷之二十七

藝文志卷之二十七



太昊帝宓犧氏母曰華胥燧人之世有大迹出雷澤華胥履之而生伏犧於成紀蛇身人首有聖德燧人氏沒宓犧代之受龍圖畫八卦所謂河出圖者也有景龍之瑞

炎帝神農氏母曰女登遊於華陽有神龍首感女登於常羊山生炎帝人身牛首有聖德致大火之瑞嘉禾生醴泉出

黃帝軒轅氏母曰附寶見大電光繞北斗樞星照郊野感而孕二  
十五月而生黃帝於壽丘弱而能言龍顏有聖德効百神朝而使  
之應龍攻蚩尤戰虎豹熊羆四獸之力以女魃止淫雨天下既定  
聖德光被羣瑞畢臻有屈軼之草生於庭佞人入朝則草指之是  
以佞人不敢進有景雲之瑞有赤方氣與青方氣相連赤方中有  
兩星青方中有一星凡三星皆黃色以天清明時見於攝提名曰  
景星黃帝黃服齊於中宮坐於玄扈洛水之上有鳳凰集不食生

蟲不履生草或止帝之東園或巢於阿閣或鳴於庭其雄自歌其  
雌自舞麒麟在園神鳥來儀有大螻如羊大蟻如虹黃帝以土氣  
勝遂以土德王五十年秋七月庚申天霧三日三夜晝昏黃帝以  
問天老力牧容成曰於分何如天老曰臣聞之國安其主好文則  
鳳凰居之國亂其主好武則鳳凰去之今鳳凰翔於東郊而樂之  
其鳴音中夷則與天相副以是觀之大有嚴教以賜帝帝勿犯也  
乃召史卜之龜焦史曰臣不能占也其問之聖人帝曰已問天老  
力牧容成矣史北面再拜曰龜不違聖智故焦霧除遊於洛水之  
上見大魚殺五牲以醮之天乃甚雨七日七夜魚流於海得圖書  
焉龍圖出河龜書出洛赤文篆字以授軒轅軒轅接萬神於明庭  
今寒門谷口是也

帝摯少昊氏母曰女節見星如虹下流華渚旣而夢接意感生少



吳登帝位有鳳凰之瑞

帝顓頊高陽氏母曰女樞見瑤光之星貫月如虹感已於幽房之宮生顓頊於若水首戴干戈有聖德生十年而佐少昊氏二十而登帝位

帝嚳高辛氏生而駢齒有聖德代高陽氏王天下使鼓人拊鞀鼓擊鍾磬鳳凰鼓翼而舞

帝堯之母曰慶都生於斗維之野常有黃雲覆護其上及長觀於三河常有龍隨之一旦龍負圖而至其文要曰亦受天祐眉八彩鬢髮長七尺二寸面銳上豐下足履翼宿既而陰風四合赤龍感之孕十四月而生堯於丹陵其狀如圖及身長十尺有聖德封於唐夢攀天而上高辛氏衰天下歸之在帝位七十年景星出翼鳳凰在庭朱草生嘉禾秀甘露醴泉出日月如合璧五星如連

珠厨中自生肉其薄如箠搖動則風生食物寒而不臭名曰筮脯又有草夾階而生月朔始生一莢月半而生十五莢十六日以後日落一莢及晦而盡月小則一莢焦而不落名曰蓂莢一曰曆莢歸功於舜將以天下禪之乃潔齋脩壇塲於河雒擇良日率舜等升首山遵河渚有五老遊焉蓋五星之精也相謂曰河圖將來告帝以期知我者重瞳黃姚五老因飛為流星上入昴二月辛丑昧明禮備至於日昊榮光出河休氣四塞白雲起回風搖乃有龍馬銜甲赤文綠色臨壇而止吐甲圖而去甲似龜背廣九尺其圖以白玉為檢赤玉為泥以黃金約以青繩檢文曰闔色授帝舜言虞夏殷周秦漢當授天命帝乃寫其言藏於東序後二年二月仲辛率羣臣沈璧於洛禮畢退侯至於下昊赤光起玄龜負書而出背甲赤文成字止於壇其書言當禪舜遂讓舜



帝舜有虞氏母曰握登見大虹意感而生舜於姚墟目重瞳子故名重華龍顏大口黑色身長六尺一寸舜父母憎舜使其塗廩自下焚之舜服易工衣服飛去又使浚井自上填之以石舜服龍工衣自傍而出耕於歷夢眉長與髮等及卽帝位蓂莢生於階鳳凰巢於庭擊石拊石百獸率舞景星出房地出乘黃之馬西王母獻白環玉玦舜在位十有四年奏鐘石笙箎未罷而天大雷雨疾風發屋拔木桴鼓播地鐘磬亂行舞人頓伏樂正狂走舜乃擁璿持衡而笑曰明哉夫天下非一人之天下也亦乃見於鐘石笙箎乎乃薦禹於天使行天子事於時和氣普應慶雲興焉若烟非烟若雲非雲郁郁紛紛蕭索輪囷百工相和而歌慶雲帝乃倡之曰慶雲爛兮禮縵縵兮日月光華且或旦兮羣臣咸進稽首曰明明上天爛然星陳日月光華弘予一人帝乃再歌曰日月有常星辰有

行四時從經萬姓允誠於予論樂配天之靈遷於聖賢莫不咸聽龔乎鼓之軒乎舞之精華以竭褰裳去之於是八風脩通慶雲叢聚蟠龍奮迅於其藏蛟魚踊躍於其淵龜鼈咸出其穴遷虞而事夏舜乃設壇於河依堯故事至於下吳榮光休氣至黃龍負圖長三十二尺廣九尺出於壇畔赤文綠錯其文言當禪禹

帝禹有夏氏母曰脩巳出行見流星貫昴夢接意感既而吞神珠脩巳背剖而生禹於石紐虎鼻口兩耳參鏤首戴鈎鈐匈有玉斗足文履巳故名文命長有一德長九尺九寸夢自洗於河以手取水飲之又有白狐九尾之九當堯之世舜舉之禹觀於河有長人白面魚身出曰吾河精也呼禹曰文命治淫言訖授禹河圖言治水之事乃退入於淵禹治水旣畢天錫玄珪以告成功夏道將興艸木暢茂青龍止於郊祝融之神降於崇山乃受舜禪卽天子之



位洛出龜書六十五字是爲洪範此謂洛出書者也南巡狩濟江中流有二黃龍負舟舟人皆懼禹笑曰吾受命於天屈力以養人生性也死命也奚憂龍哉龍於是曳尾而逃

高辛氏之世妃曰簡狄以春分玄鳥至之日從帝祀郊禘與其妹浴於玄丘之水有玄鳥銜卵而墜之五色甚好二人競取覆以玉筐簡狄先得而吞之遂孕匈剖而生契長爲堯司徒成功於民受封於商後十三世生主癸主癸之妃曰扶都見白氣貫月意感以乙口生湯號天乙豐下銳上膺而有聳匈身而揚聲身長九尺臂有四肘是曰殷湯湯在亳能脩其德伊摯將應湯命夢乘船過日月之傍湯乃東至於洛觀帝堯之壇沈璧退立黃魚雙踴黑鳥隨魚止於壇化爲黑玉又有黑龜並赤文成字言夏桀無道湯當代之禱杙之神見於邳山有神牽白狼銜鈎而入商朝金德將盛銀

自山溢湯將奉天命放桀夢及天而揚之遂有天下商人後改天下之號曰殷

高辛氏之世妃曰姜嫄助祭郊禘見大人迹履之當時歆如有人道感已遂有身而生男以爲不祥棄之阨巷羊牛避而不踐又送之山林之中會伐林者薦覆之又取而置寒水上大鳥來以一翼藉覆之姜嫄以爲異乃收養焉名之曰棄枝頤有異相長爲堯稷官有功於民后稷之孫曰公劉有德諸侯皆以天子之禮待之初黃帝之世讖言曰西北爲王期在甲子昌制命發行誅旦行道及公劉之後十三世而生季歷季歷之十季飛龍盈於殷之牧野此蓋聖人在下位將起之符也季歷之妃曰大任夢長人感已浚於豕牢而生昌是爲周文王龍顏虎肩身長十尺匈有四乳大王曰吾世當有興者其在昌乎季歷之兄曰太伯知天命在昌適越終



身不反弟仲雍從之故季歷爲嗣以及昌昌爲西伯作邑於豐文王之妃曰大妣夢商庭生棘太子發植梓樹於闕間化爲松柏棫柞以告文王文王幣告羣臣與發並拜告夢季秋之甲子赤爵銜書及豐止於昌戶昌拜稽首受之其文要曰姬昌蒼帝子亡殷者紂王將畋史徧卜之曰將大獲非熊非羆天遺汝師以佐昌臣太祖史疇爲禹卜畋得皐陶其兆如此王至於磻谿之水呂尚釣於涇王下趨拜曰望公七年乃今見光景於斯尚立變名答曰望釣得玉璜其文要曰姬受命昌來提撰爾雒鈐報在齊尚出遊見赤人自雒出授尚書曰命曰呂佐昌者子文王夢日月著其身又鸞鷲鳴於岐山孟春六旬五緯聚房後有鳳凰銜書遊文王之都書又曰殷帝無道虐亂天下皇命已移不得復久靈祇遠離百神吹去五星聚房昭理四海文王旣沒太子發代立是爲武王武王駢

齒望羊將伐紂至於孟津八百諸侯不期而會咸曰紂可伐矣武王不從及紂殺比干囚箕子微子去之乃伐紂度孟津中流白魚躍入王舟王俯取魚長三尺目下有赤文成字言紂可伐王寫以世字魚文消燔魚以告天有火自天止於王屋流爲赤鳥鳥銜穀焉穀者紀后稷之德火者燔魚以告天天火流下應以吉也遂東伐紂勝於牧野兵不血刃而天下歸之乃封呂望於齊周德旣隆草木茂盛蒿堪爲宮室因名蒿宮武王沒成王少周公旦攝政七年制禮作樂神鳥鳳凰見冀莢生乃與成王觀於河洛沈璧禮畢王退侯至於日昧榮光並出幕河青雲浮至青龍臨壇銜玄甲之圖坐之而去禮於洛亦如之玄龜青龍蒼光止於壇背甲刻書赤文成字周公援筆以世文寫之書成文消龜墮甲而去其言自周公訖於秦漢盛衰之符麒麟遊苑鳳凰翔庭成王援琴而歌曰鳳



鳳翔兮於紫庭余何德兮以感靈賴先王兮恩澤臻于胥樂兮民以寧

魯哀公十四年孔子夜夢三槐之間豐沛之邦有赤烟氣起乃呼顏淵子夏往視之驅車到楚西北范氏街見芻兒摘麟傷其左前足薪而覆之孔子曰兒來汝姓爲赤誦名子喬字受紀孔子曰汝豈有所見邪兒曰見一禽巨如羔羊頭上有角其未有肉孔子曰天下已有主也爲赤劉陳項爲輔五星入井從歲星兒發薪下麟示孔子孔子趨而往麟蒙其耳吐三卷圖廣三寸長八寸每卷二十四字其言赤劉當起曰周亡赤氣起大燿興玄丘制命帝卯金孔子作春秋制孝經既成使七十二弟子向北辰星罄折而立使曾子抱河洛事北向孔子齋戒向北辰而拜告備於天曰孝經四卷春秋河洛凡八十一卷謹已備天乃洪鬱起白霧摩地赤虹自

上下化爲黃玉長三尺上有刻文孔子跪受而讀之曰寶文出劉季握卯金刀在軫北字禾子天下服

漢高帝父曰劉執嘉執嘉之母夢赤鳥若龍戲已而生執嘉是爲太上皇帝母名含始是爲昭靈后昭靈后游於洛池有玉雞銜赤珠刻曰玉英吞此者王昭靈后取而吞之又寢於大澤夢與神遇是時靄電晦冥太上皇視之見蛟龍在其上遂有身而生季是爲高帝高帝隆準而龍顏美須頰左股有七十二黑子微時數從王媪武負貫酒醉臥上常有光怪每留飲售輒數倍武負異之輒折其契單父人呂公好相人見高帝謂曰臣少好相人相人多矣無如季相願季自愛臣有息女願爲箕帚妾呂公妻媪怒呂公曰公常竒此女欲爲貴人沛令善公求不與何妄許劉季呂公曰非女子所知卒與高帝生惠帝魯元公主呂后嘗與兩子居田中有一



老公過請飲呂后因饋之食老父相呂后曰夫人天下貴人也令相二子見惠帝曰夫人所以貴者乃此男相魯元公主亦貴老父已去高帝適從傍舍來呂后具言之高帝追問老父老父曰向者夫人兒子之貴皆以君相君貴不可言高帝被飲夜行徑澤中前人反曰有大蛇當道願還高帝醉曰壯士行何畏乃前拔劍斬蛇蛇分爲兩道開而過後人來者見老姬守蛇曰向者赤帝子過殺之見者疑姬爲詐欲笞之忽然不見具其狀告高帝帝心喜秦始皇帝曰東南有天子氣於是東遊以厭之高帝隱於芒碭山澤之間呂后常知其處高帝怪問之對曰季所居上常有雲氣故知之高帝爲沛公入秦五星聚於東井歲星先至而四星從之占曰以義取天下初張良遊於下邳沂水之上有老父來直至良前而墮其履顧謂良曰孺子下取履良愕然欲毆之以其老乃下取跪進

父以足受笑而去良殊大驚父去里所復來曰孺子可教也後五日平明與我會此良怪之跪應曰諾五日良往父已先來怒曰何與長者期而後也五日更與我會此凡三期而良前至老父喜曰不當如是邪卽出懷中一卷書與之曰讀之此爲王者師後十三年孺子見我濟北穀城山下黃石卽我也旦視其書乃太公兵法良以黃石篇爲佗人說皆不省唯高帝說焉良曰此殆天所授矣五年而成帝業後十三年張良果得穀城山下黃石寶而祠之死與合葬

文帝之母薄姬魏豹爲魏王納之後宮許負相之當生天子魏王豹於是背漢漢高帝擊虜而薄姬輸織室高帝見而美之內於後宮歲餘乃得幸將見幸薄姬言妾昨夢青龍據妾心高帝曰我也吾爲爾成之一御而生文帝



景帝王皇后初嫁爲金王孫妻母臧兒卜筮曰當貴乃奪金氏而  
內太子宫生男男方在身夢日入其懷以告太子太子曰是貴徵  
也生男是爲武帝

武帝趙婕妤家在河間生而兩手皆拳不可開武帝巡守過河間  
望氣者言此有奇女天子氣召而見之武帝自披其手卽時申得  
一玉鈎由是見幸號曰拳夫人進爲婕妤居鈎弋宮大有寵十四  
月生男是爲昭帝號曰鈎弋子武帝曰聞昔堯十四月而生今鈎  
弋子亦然乃名其門曰堯母門

昭帝元鳳二年正月太山萊蕪山南民夜聞訥訥有數千人聲晨  
往視之見大石自立高丈五尺大三十八圍入地八尺三石爲足  
立後白鳥數千集其旁又上林苑中柳樹斷臥地一朝自起生枝  
葉蟲嚙其葉成文曰公孫病已立陳留襄邑王社忽移至長安博

士睦孟占之曰石陰類太山岱宗王者禪代之處將有廢故之家  
姓公孫名病已從白衣爲天子者時昭帝幼少霍光輔政以孟妖  
言誅之及昭帝崩昌邑王又廢光立宣帝武帝曾孫本名病已在  
民間白衣三世如孟言焉

元帝王皇后齊田氏之苗裔祖父翁孺自東平陵徙元城元城建  
公曰昔春秋沙鹿崩晉史卜之陰爲陽雄土火相乘故沙鹿崩後  
六百四十五年宜有聖女與其齊田乎今翁孺之徙正值其地日  
月當之元城郭東有五鹿之墟卽沙鹿地後八十年當有貴女興  
天下翁孺生禁妻李氏方妊身夢月入其懷生女是爲元后每  
許嫁未行所許者輒死卜相者云當大貴遂爲元帝皇后生成帝  
初秦始皇世有長人十二身長五丈足跡六尺見於壘西臨洮前  
史以爲秦亡之徵史臣以爲漢興之符也自高帝至於平帝十二



主焉

光武皇帝父爲濟陽令濟陽有武帝行宮常封閉哀帝建平元年十二月甲子夜光武將產乃開而居之時有赤光室中盡明皇考異焉使卜者王長卜之長辟左右曰此善事不可言是歲有嘉禾生產屋景天中一莖九穗異於凡禾縣界大豐故名光武曰秀時又有鳳凰集濟陽於是畫宮爲鳳凰之象明年方士有夏賀良者上言哀帝云漢家歷運中衰當再受命於是改號爲太初元將元年稱陳聖劉太平皇帝以厭勝之王莽時善望氣者蘇伯阿望光武所居縣春陵城郭喏曰氣佳哉鬱鬱葱葱然莽忌惡漢而錢文有金乃改鑄貨泉以易之旣而光武起於春陵之白水鄉貨泉之文爲白水真人也初起兵望見家南有火光以爲人持火呼之而光遂盛莽然上屬天有頃不見及在河北爲王郎所逼將南濟滹

沱河導吏還云河水流漸無船可渡左右皆恐懼帝更遣王霸視之霸往視如吏言霸慮還以實對驚動衆心乃謬云水堅可渡帝馳進比至而河水皆合其堅可乘旣渡餘數乘車未畢而水陷前至下博城西疑所之有一白衣老公在道旁曰努力信都爲長安城守去此八十里耳言畢失所在遂至信都投太守任光初光武微時穰人蔡少公曰讖言劉秀發兵捕不道卯金脩德爲天子國師公劉子駿名秀少公曰國師公是也光武笑曰何用知非僕道士西門君惠等並云劉秀當爲天子光武平定河北還至中山將軍萬脩得赤伏符言光武當受命羣臣上尊號光武辭前至鄴縣諸生疆華又自長安詣鄴上赤伏符文與脩合羣下又請曰受命之符人應爲大光武又夢乘赤龍登天乃卽位都洛陽營宮闕一夕有門材自至是時琅邪開陽縣城門一夕無故自亡檢所得材



卽是也遂名其門曰開陽門先是秦穆公時陳倉人掘地得物若羊非羊若猪非猪怪將獻之道逢二僮子謂之曰子知彼乎名爲徇常在地下食死人腦若欲殺之以栢東南枝指之則死矣徇因言曰此二僮子名爲寶得其雄者王得其雌者霸於是陳倉人遂棄徇而逐二僮子二僮子化爲雉飛入林陳倉人以告穆公穆公發徒大獵得其雌者化而爲石置之汧渭之間至文公爲之立祠名曰陳寶祠雉南飛集南陽穰縣其後光武興於南陽光武之初興也隗躡擁衆隴右招集英稜而公孫述稱帝於蜀天下雲擾大者連州郡小者據縣邑躡問扶風人班彪曰往者周亡戰國並爭天下分裂數世然後定縱橫之事復起於今乎將承運迭興在於一人也願先生論之對曰周之廢興與漢異昔周立爵五等諸侯從政本根旣微枝葉疆大故其末流有縱橫之事其勢然也漢家

承秦之制郡縣治民主有專已之威臣無百年之柄至於成帝假借外家哀平短祚國嗣三絕禍自上起傷不及下故王氏之貴傾擅朝廷能竊號位而不根於民是以卽真之後天下莫不引領而歎十餘年間中外騷擾遠近俱發假號雲合咸稱劉氏不謀而同辭方今雄桀帶州域者皆無七國世業之資詩云皇矣上帝臨下有赫鑒觀四方求民之瘼今民皆謳吟思漢向仰劉氏已可知矣隗躡曰先生言周漢之勢可也至於但見愚民習識劉氏姓號之故而謂漢復興疎矣昔秦失其鹿劉季逐而持之時民復知漢乎彪旣感躡言又愍狂狡之不息乃著王命論以救時難辭曰昔在帝堯之禪曰咨爾舜天之曆數在爾躬舜亦以命禹洎於稷契咸佐唐虞光濟四海奕世載德至於湯武而有天下雖其遭遇異時禪代不同至於應天從民其揆一焉是故劉氏承堯之祚氏族之



世著於春秋言據火德而漢紹之始起沛澤則神母夜號以章赤帝之符由是言之帝王之祚必有明聖顯懿之德豐功厚利積累之業然後精誠通於神明流澤加於生民故能爲鬼神所福嚮天下所歸往未見運世無本功德不紀而得崛起在此位者也世俗見高祖興於布衣不達其故以爲適遭暴亂得奮其劍遊說之士至比天下於逐鹿幸捷而得之不知神器有命不可以智力求也悲夫此世之所以多亂臣賊子者也若然者豈徒闇於天道哉又不覩之於人事矣夫饑饉流隸饑寒道路思有裋褐之褻檐石之畜所願不過一金然終於轉死溝壑何則貧窮亦有命也況乎天子之貴四海之富神明之祚可得而妄據哉故雖遭罹厄會竊其權柄勇如信布疆如梁籍成如王莽然卒潤鑊伏鑕亨蒞分裂又況么麼不及數子而欲闇干天位者乎是故駑蹇之乘不騁千里

之塗燕雀之儔不奮六翮之用案梲之林不荷棟梁之任斗筭之子不秉帝王之重易曰鼎折足覆公餗不勝其任也當秦之末豪桀共推陳嬰而王之嬰母止嬰曰自吾爲子家婦而世貧賤卒富貴不祥不如以兵屬人事成少受其利不成禍有所歸嬰從其言而陳氏以寧王陵之母亦見項氏之必亡而劉氏之將興也是時陵爲漢將而母獲於楚有漢使來陵母見之謂曰願告吾子漢王長者必得天下子謹事之無有二心遂對漢使伏劍而死以固勉陵其後果定於漢陵爲宰相封侯夫以匹婦之明猶能推事理之致探禍福之機全宗祀於無窮垂冊書於春秋而況大丈夫之事乎是故窮達有命吉凶由人嬰母知廢陵母知興審此二者帝王之分決矣蓋在高祖其興也有五一曰帝堯之苗裔二曰體貌多奇異三曰神武有徵應四曰寬明而仁恕五曰知人善任使加之



以信誠好謀達於聽受見善如不及用人如由己從諫如從流趨時如響赴當食吐哺納子房之冊拔足揮洗揖酈生之說寤戍卒之言斷懷土之情高四皓之名割肌膚之愛舉韓信於行陣收陳平於亡命英雄陳力羣才畢舉此高祖之大略所以成帝業也若乃靈瑞符應又可略聞矣初劉媪任高祖而夢與神遇震雷晦冥有龍蛇之怪及長多靈異有殊於衆是以王武感物而折契呂公覩貌而進女秦皇東遊以厭其氣呂后望雲而知所處始受命則白蛇分西入關則五星聚故淮陰留侯謂之天授非人力也歷古今之得失驗行事之成敗稽帝王之世運考五者之所謂取舍不厭斯位符應不同斯度而欲昧於權利越久妄據外不量力內不知命則必喪保家之主失大年之壽遇折足之凶伏鈇鉞之誅英雄誠知覺寤畏若禍戒超然遠覽淵然深識收陵嬰之明分絕信

布之覬覦距逐鹿之瞽說審神器之有授無貪不可幾爲二母之所笑則福祚流於子孫天祿其永終矣隗躡不納果敗

漢元成世道士言讖者云赤厄三七三七二百一十年有外戚之篡祚極三六當有龍飛之秀興復祖宗及莽篡漢漢二百一十年矣莽十八年而敗光武興焉

明帝初生豐下銳上赤色似堯終登帝位

和帝鄧皇后祖父禹佐命光武常曰我將百萬人未嘗妄殺一人子孫當大興后少時相者蘇大見后驚曰此成湯之骨法也貴不可言后嘗夢登梯以手捫天天體蕩蕩正青而滑有若鍾乳者后仰吮之以訊之占夢占夢者曰堯攀天而止湯夢及天而吮之此皆非常夢也既而入宮遂登尊位安帝未卽大位在邸數有神光赤蛇嘉應照曜室內磐紆殿屋牀第之間後遂入承大統



初桓帝之世有黃星見於楚宋之分遼東殷墟曰後五十年當有真人起於譙沛之間其鋒不可當靈帝熹平五年黃龍見譙光祿大夫喬玄問太史令單颺曰此何祥也颺曰其國後當有王者興不及五十年亦當復見天事恒象此其徵也內黃殷登嘿記之其後曹操起於譙是爲魏武帝建安五年於黃星見之歲五十年矣而武帝破袁紹天下莫敵

春秋識曰代漢者當塗高也漢有周舒者善內學人或問之舒曰當塗高者魏也舒旣沒譙周又問術士杜瓊曰周徵君以爲當塗高魏也其義何在瓊曰魏闕名也當塗而高聖人以類言耳又問周曰寧復有所怪邪周曰未達也瓊曰古者各官職不言曹自漢以來各官盡言曹吏言屬曹卒言侍曹此殆天意也周曰魏者大也曹者衆也衆而且大天下之所歸乎建安十八年武帝爲公又

進爵爲王二十五年武帝薨太子丕嗣爲魏王是爲文帝文帝始生有雲青色員如車蓋當其上終日望氣者以爲至貴之祥非人臣之氣善相者高元呂曰其貴不可言延康元年三月黃龍又見譙殷登猶存歎曰黃龍見於熹平也單颺云不及五十年亦當復見今四十五年矣颺之言其驗茲乎十月饒安言白虎見八月石邑言鳳凰集又有麒麟見十月漢帝禪位於魏魏王辭讓不受博士蘇林董巴上言臣聞天之去就固有常分聖人當之昭然不疑故堯捐骨肉而禪有虞終無吝色舜發壟畝而居天下若固有之其相授閒不稽漏刻天下已傳矣所以急天命明天下不可一日無君今漢期運已終妖異絕之已審陛下受天之命符瑞告徵丁寧詳悉反覆備至雖言語相諭無以代此今旣發詔書璽綬未御固執謙讓上稽天命下違民情臣謹按古之典籍參以圖緯魏之



行運及天道所在卽尊之驗在於今年此月昭哲分明謹條奏如左唯陛下遷思易慮以時卽位顯告上帝布詔天下然後改正朔易服色正大號天下幸甚其所陳事曰天有十二次以爲分野王公之國各有所屬周在鶉火魏在大梁歲屋行歷凡十二次所在國天子受命諸侯以封周文王始受命歲星在鶉火至武王伐紂十三年歲星復在鶉火故春秋傳曰武王伐紂歲在鶉火又曰歲之所在則我有周之分野也昔光祿十七年歲在大梁武王始受命爲將討黃巾是歲改年爲中平元年建安元年歲復在大梁始拜大將軍十三年復在大梁始拜丞相今二十五年歲復在大梁陛下受命此魏得歲與周文武受命相應今年青龍在庚子詩推度災曰唐者更也子者茲也聖人制法天下治又曰王者布德於子治成於丑此言今年天更命聖人制法天下布德於民也魏以

政制天下與詩協矣顓頊受命歲在豕韋衛居其地亦在豕韋故春秋傳曰衛顓頊之墟也今十月斗之所建則顓頊受命之分也魏以十月受禪此同符始祖受命之驗也魏之氏族出自顓頊與舜同祖見於春秋世家舜以土德承堯之火今魏亦以上德承漢之火其於行運合於堯舜授受之次魏王猶未許太史臣許芝又上天文祥瑞自建安三年十二月戊辰有新天子氣見於東南到今積二十三年建安十年彗星出庫樓歷犯氐房宿北入天市犯北斗紫微氏爲天子宿宮路寢所止房爲天子明堂政教之首北斗七星主尊輔象近臣紫微者北極最尊此除掃漢家之大異也建安十八年秋歲星鎮星熒惑俱入太微逆行留守帝座百有餘日歲星入太微人主改姓鎮星入太微內有兵亂人主以弱三者漢改姓易代之異也建安十九年正月白虹貫日易傳曰后妃擅



國白虹貫日建安二十一年五月朔己亥日蝕建安二十三年三月  
月弗星晨見東方二十餘日夕出西方犯歷五車平井五諸侯文  
昌軒轅太微鋒炎刺帝坐弗者除舊布新亡惡興聖之異也建安  
二十四年二月晦壬子日蝕日者陽精月爲侯王而以亥子日蝕  
皆水滅火之異也延康元年九月十日黃昏時月蝕熒惑過人定  
時熒惑出營室宿羽林月爲大臣侯王之象熒惑火精漢氏之行  
占曰漢家以兵亡延康元年九月二十日剝卦天子氣不見皆崩  
亡之異也熒惑火精行縮日一度有餘故太史令王昱以爲漢家  
衰亡之極熒惑大而赤色光不明赤而小與小星無別皆赤家衰  
亡之異也易傳曰上下流通聖賢昌厥應帝德鳳凰翔萬民喜樂  
無咎殃易傳又曰聖人受命厥應鳳凰下天子虜易傳又曰黃龍  
見天災將至天子紬聖人出黃龍以戊巳日見五色文章皆具聖

人得天受命黃龍以戊寅見此帝王受命之符瑞最著明者也易  
傳又曰聖人清靜行中正賢人至民從命厥應麒麟來春秋玉版  
讖曰代赤者魏公子春秋佐助期曰漢以許昌失天下故白馬令  
甘陵李雲上事言許昌氣見當塗高已萌欲使漢家防絕萌芽今  
漢都許曰以微弱當居許昌以失天下當塗高者魏也魏者象魏  
兩闕之名當道而高大者也魏當代漢如李雲之言也春秋佐助  
期又曰漢以蒙孫亡說者以蒙孫直漢二十四帝童蒙愚惑以弱  
亡漢帝少時名爲董侯名不正蒙亂荒惑其子孫以弱亡也孝經  
中黃讖曰日載東紀火光不橫一聖明聰四百之外易姓而王天  
下歸功致太平此魏王之姓諱著見圖讖也易運期曰言居東西  
有午兩日並光日居下其爲王及爲輔五八四十黃氣受真人出  
言午許字兩日昌字漢當以許亡魏當以許昌今際會之期在許



其大效也易運期又曰鬼在山禾女運王天下於是魏王受漢禪柴於繁陽有黃鳥銜丹書集於尚書臺於是改元爲黃初漢中平二年洛陽民譌言虎賁寺有黃人觀者日數萬道路斷絕中平元年黃巾賊起云蒼天已死黃天當立此魏氏依劉向自云土德之符也先是周敬王之四十七年宋景公問大夫邢史子臣天道何祥對曰後五年五月丁亥臣將死死後五年五月丁卯吳將亡亡後五年君將終終後四百年邾王天下皆如其言邾王天下蓋謂魏國之後言四百年則錯疑年代久遠傳記者謬誤

高貴公初生有光氣照耀室屋其後卽大位

劉備身長七尺七寸垂手過膝顧自見耳洛書甄耀度曰赤三德昌九世會備合帝際洛書寶子命曰天度帝道備稱皇以統握契百成不敗洛書錄運期曰九侯七傑爭民命炊骸道路誰使主者

玄且來備字玄德故云玄且來也孝經鉤命決曰帝三建九會備先是術士周羣言西南數有黃氣直立數丈如此積年每有景雲祥風從璿璣下應之建安二十二年中屢有氣如旗從西竟東中天而行圖書曰必有天子出其方太白熒惑鎮星從歲星又黃龍見犍爲武陽之赤水九日乃去關羽在襄陽男子張嘉王休獻玉璽備後稱帝於蜀

孫堅之祖名鐘家在吳郡富春獨與母居性至孝遭歲荒以種瓜爲業忽有三少年詣鐘乞瓜鐘厚待之三人謂鐘曰此山下善可作冢葬之當出天子君可下山百步許顧見我去卽可葬也鐘去三十步便反顧見三人並乘白鶴飛去鐘死卽葬其地地在縣城東冢上數有光怪雲氣五色上屬天衍數里父老相謂此非凡氣孫氏其興矣堅母姪堅夢腸出繞吳昌門以告隣母隣母曰安知



非吉祥也昌門吳郭門也堅生而容貌奇異堅妻吳氏初娠子策  
夢月入其懷後孕子權又夢日入懷告堅曰昔姪策夢月入懷今  
又夢日入懷何也堅曰日月陰陽之精極貴之象吾子孫其興乎  
權方頤大口紫髯長上短下漢世有劉琬者能相人見權兄弟曰  
孫氏兄弟雖各才智明達然祿祚不終惟中弟孝廉形貌奇偉骨  
體不恒有大貴之表年又最壽爾其識之權時爲孝廉初秦始皇  
東巡濟江望氣者云五百年後江東有天子氣出於吳而金陵之  
地有王者之勢於是秦始皇乃收金陵曰秣陵鑿北山以絕其勢  
至吳又令囚徒十餘萬人掘汙其地表以惡名故曰囚卷縣今嘉  
興縣是也漢世術士言黃旗紫蓋見於斗牛之間江東有天子氣  
獻帝興平中吳中謠言黃金車斑闕耳開昌門出天子魏文帝黃  
初三年舉兵武昌並言黃龍鳳凰見其年權稱尊號年至七十一

而薨權子休初封琅邪王夢乘龍上天顧不見尾後得大位其  
被廢

漢元成之世先識之士有言曰魏年有和當有開石於西三千餘  
里繫五馬文曰討曹及魏之初興也張掖刪丹縣金山柳谷有石  
生焉周圍尋中高一仞蒼質素章有五馬麟鹿鳳凰仙人之象始  
見於建安形成於黃初文備於太和至青龍三年柳谷之玄川  
漏石形改易狀似雲龜廣一丈七尺一寸圍五丈八寸立於川西  
有石馬十二其一仙人騎之其一騎鞞其五有形而不善成其五  
成形又有一牛八卦列宿彗星之象有玉匣開蓋於前有玉玦二  
玉璜一又有麒麟鳳凰白虎馬牛於中布剝有文字曰上上三天  
王述大會討大曹金但取之金立中大金馬一匹中正大吉關壽  
此馬甲寅述水凡三十五字石色蒼而物形及字並白石書之皆



隆起魏明帝惡其文有討曹鑿去爲計以蒼石塞之宿昔而白石滿焉當時稱爲祥瑞班下天下處士張璠曰夫神兆未然不追往事此蓋將來之休徵當今之怪異也旣而晉以司馬氏受禪太尉屬程猗說曰夫大者盛之極也金者晉之行也中者物之會也吉者福之始也此言司馬氏之王天下感德而生應正吉而王之符也猗又爲贊曰皇德遐通實降嘉靈乾生其象坤育其形玄石旣表素文以成瑞虎合仁白麟耀精神馬自圖金言其形體正而王中允克明關壽無疆於萬斯齡宣帝有狼顧之相能使面正向後而身形不異魏武帝嘗夢有三匹馬在一槽中共食其後宣帝及景文相係爲宰相遂傾曹氏文帝未立世子有意於齊獻王攸武帝時爲中撫軍懼不立以相貝示裴秀秀言於文帝曰中撫軍振髮籍地垂手過膝天表如此非人臣之相也由是得立及嗣晉位

其月襄武縣言有大人相長三丈餘足跡三只一寸白髮黃單衣黃巾拄杖呼民王始語云今當太平頃之受魏禪

武帝咸寧元年大風吹帝社樹折有青氣出社中占者以爲東筦有天子氣時琅邪武王佑封東筦佑元帝祖也元帝以咸寧二年夜生有光照室室內盡明有白毛生於日角之左眼有精光耀隨惠帝幸鄴成都王穎殺東安王繇繇元帝叔父也帝懼欲出奔而月明邀候急四衢斷絕不得去有頃天陰風雨大至候者皆休乃得去初武帝伐吳琅邪武王佑率衆出塗中而王渾逼歷陽王濬已次近路孫皓欲降送天子璽綬近越二將而遠送詣佑識者咸怪之吳之未亡也吳郡臨平湖一旦自開湖邊得石匣中有小青石刻作皇帝字舊言臨平湖塞天下亂開則天下太平吳人以爲美祥俄而吳滅後元帝興於江左吳亡後蔣山上常有紫雲數術



者亦云江東猶有帝王氣又謠言曰五馬游度江一馬化爲龍元  
帝與西陽汝南南頓彭城五王過江而元帝升天位讖書曰銅馬  
入海建業期元帝小字銅環永嘉初元帝以安東將軍鎮建業時  
歲鎮星辰太白四星聚於牛女之間常襄回進退愍帝建興四年  
晉陵武進人陳龍在田中得銅鐸五枚柄口皆有龍虎形又有將  
雛雞雀集其前皆驅去復還至於再三又有鵝三四頭高飛且鳴  
周回東西晝夜不下如此者六七日會稽剡縣陳清又於井中得  
棧鐘長七寸二分口徑四寸其器雖小形制甚精上有古文書十  
八字其四字可識云會稽徽命豫章有大樟樹大三十五圍枯死  
積久永嘉中忽更榮茂景純並言是元帝中興之應初武帝太康  
三年建鄴有寇餘姚人伍振筮之曰寇已滅矣三十八年揚州有  
天子至元帝卽天位果三十八年先是宣帝有寵將牛金屢有功

宣帝作兩口榼一口盛毒酒一口盛善酒自飲善酒毒酒與金金  
飲之卽斃景帝曰金名將可大用云何害之宣帝曰汝忘石瑞馬  
後有牛乎元帝母夏侯妃與琅邪國小史姓牛私通而生元帝愍  
帝之立也改毗陵爲晉陵時元帝始霸江揚而戎翟稱制西都微  
弱于寶以爲晉將滅於西而興於東之符也宋武帝居在丹徒始  
生之夜有神光照室其夕甘露降於墓樹皇考以高祖生有奇異  
名爲奇奴皇妣旣殂養於舅氏改爲寄奴焉少時誕節嗜酒自京  
都還息於逆旅逆旅姬曰室內有酒自入取之帝入室飲於盎側  
醉臥地時司徒王謐有門生居在丹徒還家亦至此逆旅逆旅姬  
曰劉郎在室內可入共飲酒此門生入室驚出謂姬曰室內那得  
此異物姬遽入之見帝已覺矣姬密問向何所見門生曰見有一  
物五采如蛟龍非劉郎門生還以白謐謐戒使勿言而與結厚帝



嘗行至下邳遇一沙門沙門曰江表尋當喪亂拯之必君也帝患手創積年沙門出懷中黃散一裹與帝曰此創難治非此藥不能瘳也倏忽不見沙門所在以散傳創卽愈餘散帝寶錄之後征伐屢被傷通中者數矣以散傳之無不立愈自少至長目中常見二龍在前始尚小及貴轉大晉陵人車藪善相人相帝曰君貴不可言願無相忘晉安帝義熙初帝始康晉亂而興霸業焉廬江霍山常有鐘聲十二帝將征關洛霍山崩有六鐘出制度精奇上有古文書一百六十字冀州有沙門法稱將死語其弟子普嚴曰嵩皇神告我云江東有劉將軍是漢家苗裔當受天命吾以三十二壁鎮金一餅與將軍爲信三十二壁者劉氏卜世之數也普嚴以告同學法義法義以十三季七月於嵩高廟石壇下得玉壁三十二枚黃金一餅漢中城固縣水際忽有雷聲俄而岸崩得銅鐘十二

枚又鞏縣民宋耀得嘉禾九穗後二年而受晉禪孔子有雒讖曰二口建戈不能方兩金相刻發神鋒空穴無主竒入中女子獨立又爲雙二口建戈劉字也晉氏金行劉姓又有金故曰兩金相刻空穴無主竒入中爲寄字女子獨立又爲雙奴字晉旣禪宋太史令駱達奏陳天文符讖曰去義熙元年至元熙元年十月太白星晝見經天凡七占曰天下革民更王異姓興義熙元年至元熙元年十一月朔日有蝕之凡四皆蝕從上始臣民失君之象也義熙十一年五月三日彗星出天市其芒埽帝坐天市在房心之北宋之分野得彗柄者興此除舊布新之徵義熙七年七月二十五日五虹見於東方占曰五虹見天子黜聖人出義熙七年八月十一日新天子氣見東南十二年北定中原崇進宋公歲星喪回房心之間大火宋之分野與武王克殷同得歲星之分者應王也十一



年以來至元熙元季月行失道恒北入太微中占月入太微廷王  
入爲主十三年十月鎮星入太微積留七十餘日到十四年八月  
十日又入太微不去到元熙元年積二百餘日占鎮星守太微亡  
君之戒有立王有徙王十四年五月十七日彗星出北斗魁中占  
曰星第北斗中聖人受命十四年七月二十九日彗星出太微中  
彗柄起上相星下芒尾漸長至十餘丈進埽北斗及紫微中占曰  
彗星出太微社稷亡天下易政入北斗帝宮空一占天下得召人  
召人聖主也一曰彗孛紫微天下易主十四年十月一日熒惑從  
入太微鉤已至元年四月二十七日從端門出積屍留二百六日  
繞鎮星熒惑與鎮星鉤已天廷天下更紀十四年十二月歲太白  
辰襄回居斗牛之間經旬斗牛曆數之起占曰三星合是謂改立  
元熙元年十二月二十四日四黑龍登天易傳曰冬龍見天子亡

社稷大人應天命之符金雌詩云大火有心水抱之悠悠百年是  
其時火宋之分野水宋之德也金雌詩又曰云出而兩漸欲舉短  
如之何乃相咀交哉亂也當何所唯有隱巖殖禾黍西南之朋困  
桓父兩云玄字也短者云胙短也巖隱不見唯應見谷殖禾谷邊  
則聖諱炳明也易曰西南得朋故能困桓父也劉向讖曰上五盡  
寄致太平草付合成集羣英前句則陛下小諱後句則太子諱也  
十一年五月西明門地陷水涌出毀門扉闕西者金鄉之門爲水  
所毀此金德將衰水德方興之象也太興中民於井中得棧鐘上  
有古文十八字晉自宣帝至今數滿十八年義熙八年太社生桑  
明尤著者也夫六亢位也漢建安二十五年一百九十六年而禪  
魏魏自黃初至咸熙二年三十六年而禪晉晉自太始至今元熙  
二年一百五十六年三代數窮咸以六年少帝卽位景平三年四



月有五色雲見西方時文帝爲荊州刺史鎮江陵尋卽大位文帝元嘉中謠言錢唐當出天子乃於錢唐置戍軍以防之其後孝武帝卽大位於新亭寺之禪堂禪之與錢音相近也太宗爲徐州刺史出鎮彭城昭太后賜以大珠鹿盧劍此劍是御服占者以爲吉祥前廢帝永光初又謠言湘州出天子幼主欲南幸湘川以厭之旣而湘東王卽尊位是爲明帝

史臣謹按冀州道人法稱所云玉璧三十二枚宋氏卜世之數者蓋卜年之數也謂卜世者謬其言耳三十二者二三十則六十矣宋氏受命至於禪齊凡六十年云

宋書卷二十七

志第十七終

西川生鳳  
氏書同甫

宋書卷二十八

志第十八

西川生鳳  
氏書同甫

符瑞中

麒麟者仁獸也牡曰麒牝曰麟不刳胎剖卵則至麕身而牛尾狼項而一角黃色而馬足含仁而戴義音中鍾呂步中規矩不踐生蟲不折生草不食不義不飲滂池不入坑窞不行羅網明王動靜有儀則見牡鳴曰逝聖牝鳴曰歸和春鳴曰扶幼夏鳴曰養綏

漢武帝元狩元年十月行幸雍祠五時獲白麟漢武帝太始二年三月獲白麟

漢章帝元和二年以來至章和元年凡三年麒麟五十一見郡國

漢安帝延光三年七月麒麟見潁川陽翟

延光三年八月戊子麒麟見潁川陽翟



延光四年正月壬午麒麟見東郡濮陽

漢獻帝延康元年麒麟十見郡國

吳孫權赤烏元年八月武昌言麒麟見又白麟見建業

晉武帝太始元年十二月麒麟見南郡枝江

晉武帝咸寧五年二月甲午白麟見平原鬲縣咸寧五年九月甲

午麒麟見河南陽城

晉武帝太康元年四月白麟見頓丘

晉愍帝建興二年九月丙戌麒麟見襄平州刺史崔苾以聞

晉元帝大興元年正月戊子麒麟見豫章

晉成帝咸和八年五月己巳麒麟見遼東

鳳凰者仁鳥也不刳胎剖卵則至或翔或集雄曰鳳雌曰凰蛇頭  
燕頰龜背鼈腹鶴頸雞喙鴻前魚尾青首駢翼鸞立而鴛鴦思首

戴德而背負仁項荷義而膺抱信足履正而尾繫武小音中鍾大  
音中鼓延頸奮翼五光備舉興八風降時雨食有節飲有儀往有  
文來有嘉遊必擇地飲不妄下其鳴雄曰節節雌曰足足晨鳴曰  
發明晝鳴曰上朔夕鳴曰歸昌昏鳴曰固常夜鳴曰保長其樂也  
徘徊徊雍雍喈喈唯鳳凰為能究萬物通天祉象百狀達王道  
率五音成九德備文武正下國故得鳳之象一則過之二則翔之  
三則集之四則春秋居之五則終身居之

漢昭帝始元三年十月鳳凰集東海遣使祠其處漢宣帝太始元  
年五月鳳凰集膠東

太始四年五月鳳凰集北海

漢宣帝地節二年四月鳳凰集魯羣鳥從之

漢宣帝元康元年三月鳳凰集泰山陳留



元康四年南郡獲威鳳

漢宣帝神雀二年二月鳳凰集京師羣鳥從之以萬數

神雀四年春鳳凰集京師

神雀四年十月鳳凰十一集杜陵

神雀四年十二月鳳凰集上林

漢宣帝甘露三年二月鳳凰集新蔡羣鳥四面行列皆向鳳凰立以萬數

漢光武建武十七年十月鳳凰五高八九尺毛羽五采集潁川羣羣鳥並從行剡蓋地數頃留十七日乃去

漢章帝元和二年以來至章和元年凡二年鳳凰百二十九見郡國

漢安帝延光三年二月車駕東巡其月戊子鳳凰集濟南臺縣丞霍收舍樹上賜臺長嶷帛十五匹收二十四尉半之吏卒人三匹

鳳凰所過亭部無出今年田租賜男子爵人二級

延光三年十月壬午鳳凰集京兆新豐西界槐樹

漢桓帝元嘉元年十一月鳳凰見濟陰己氏

漢靈帝光和四年秋五色大鳥見新城羣鳥隨之民皆謂之鳳凰

漢獻帝延康元年八月石邑縣言鳳凰集又郡國十三言鳳凰見

吳孫權黃武五年七月蒼梧言鳳凰見

孫權黃龍元年四月樊口武昌並言鳳凰見

吳孫亮建興二年十一月大鳥五見於春申

吳孫皓寶鼎四年正月西苑言鳳凰集

晉武帝泰始元年十二月鳳凰見上黨高都

泰始元年十二月鳳凰二見河南山陽

泰始元年十二月鳳凰三見馮翊下邳



晉穆帝升平四年二月辛亥鳳凰將九子見鄖鄉之豐城十二月甲子又見豐城衆鳥隨從

升平五年四月己未鳳凰集沔北至於辛酉百姓聚觀之

宋武帝永初元年七月戊戌鳳凰見會稽山陰

文帝元嘉十四年三月丙申大鳥二集秣陵民王顛園中李樹上大如孔雀頭足小高毛羽鮮明文采五色聲音諧從衆鳥如山雞者隨之如行三十步頃東南飛去揚州刺史彭城王義康以聞改鳥所集永昌里曰鳳凰里

孝武帝孝建元年正月庚申鳳凰見丹徒愒賢亭雙鵠爲引衆鳥陪從征虜將軍武昌王渾以聞神鳥者赤神之精也知音聲清濁和調者也雖赤色而備五采雞聲鳴中五音肅肅雍雍喜則鳴舞樂處幽隱風俗從則至

漢宣帝五鳳三年三月辛丑神鳥集長樂宮東關樹上又飛下地

五采炳發留十餘刻

漢章帝元和中神鳥見郡國

黃龍者四龍之長也不漉池而漁德至淵泉則黃龍游於池能高能下能細能大能幽能冥能短能長乍存乍亡

赤龍河圖者地之符也王者德至淵泉則河出龍圖

漢惠帝二年正月癸酉兩龍見蘭陵人家井中

漢文帝十五年春黃龍見成紀

漢宣帝甘露元年四月黃龍見新豐

漢成帝鴻嘉元年冬黃龍見真定

漢成帝永始二年癸未黃龍見東萊

漢光武建武十二年六月黃龍見東阿



漢章帝元年以來至章和元年凡三年黃龍四十四見郡國  
元和中青龍見郡國

元和中白龍見郡國

漢文帝延光元年八月辛卯黃龍見九真

延光三年九月辛亥黃龍見濟南歷城

延光三年十二月乙未黃龍見琅邪諸縣

延光四年正月壬午黃龍二見東郡濮陽

漢桓帝建和元年二月黃龍見沛國譙

漢桓帝元嘉二年八月黃龍見濟陰句陽又見金城允街

漢桓帝永光元年八月黃龍見巴郡

漢獻帝延康元年三月黃龍見譙又郡國十三言黃龍見

魏明帝景初元年二月壬辰山茌縣言黃龍見蜀

魏明帝青龍元年正月甲申青龍見郊之摩陂并帝親與羣臣共  
觀之既而詔畫工圖寫龍潛不見

魏少帝正元元年十月戊戌黃龍見鄴井中

魏少帝甘露元年正月辛丑青龍見軹縣井中凡三

甘露元年六月青龍見元城縣界井中

甘露二年二月青龍見溫縣井中

甘露三年八月甲戌黃龍青龍仍見頓丘冠軍陽夏縣井中

甘露四年正月黃龍二見寧陵縣井中

魏元帝景元元年十二月甲申黃龍見莘縣井中

景元三年二月青龍見軹縣井中

劉備未即位前黃龍見武陽赤水九日乃去

吳孫權黃武元年三月鄱陽言黃龍見



吳孫權黃龍元年四月舉兵武昌並言黃龍見權因此改元作黃龍牙常在軍中進退視其所向命吳綜爲賦

吳孫權赤烏五年三月海鹽縣言黃龍見縣井中二

赤烏十一年雲陽言黃龍見黃龍二又見武陵吳壽光色炫耀

吳孫休永安四年九月市山言白龍見

永安五年七月始新言黃龍見

永安六年四月泉陵言黃龍見

晉武帝泰始元年十二月青龍二見濟陰定陶

泰始元年十二月青龍見魏郡湯陰

泰始元年十二月黃龍見河南洛陽洛濱

泰始元年十二月白龍二見太原祁

泰始二年七月壬午黃龍見巴西閬中

泰始三年四月戊午有司奏張掖太守焦勝言玄池縣大柳谷口青龍見

晉武帝咸寧二年六月丙申白龍二見於新興九原居民井中

咸寧二年十月庚午黃龍二見於漢嘉靈關

咸寧二年十一月癸巳白龍二見須度支部

咸寧五年十一月甲寅青龍見京兆霸城

晉武帝太康元年八月白龍三見

太康三年閏月巳丑白龍二見濟南歷城

太康五年正月癸卯青龍二見武庫井中帝親往觀之

太康六年九月白龍見京兆陰槃

太康九年十二月戊申青龍一見魯國公丘居民井中

晉惠帝元康七年三月巳酉朔成臯縣獄有龍昇天



宋武帝永初元年七月青龍見義興陽羨

永初元年八月青龍二見南郡江陵

文帝元嘉十三年九月己酉會稽郡西南向曉忽大光明有青龍騰躍凌雲久而後滅吳興諸處並以其日同見光景揚州刺史彭城王義康以聞

元嘉二十一年十月己丑永嘉永寧見黃龍自雲而下太守臧藝以聞

元嘉二十五年五月丁丑黑龍見玄武湖北苑丞王世宗以聞

元嘉二十五年五月戊戌黑龍見玄武湖東北隈揚州野吏張立之以聞

元嘉二十五年八月辛亥黃龍見會稽太守孟頴以聞

元嘉二十五年廣陵有龍自湖水中升天百姓皆見

孝武帝孝建二年七月癸丑黃龍見石頭城外水濱中護軍湘東王諱以聞

孝建三年五月己未龍見臨川郡江州刺史東海王禕以聞

孝武大明元年五月癸亥黑龍見晉陵占石邨改邨爲津里

靈龜者神龜也王者德澤湛清漁獵山川從時則出五色鮮明三百歲游於藻葉之上三千歲常游於卷耳之上知存亡明於吉凶禹甲宮室靈龜見

玄龜書者天符也王者德至淵泉則雒出龜書

魏文帝初神龜出於靈池

吳孫權時靈龜出會稽章安

魏元帝咸熙二年二月甲辰朐縣獲靈龜以獻

晉長沙王乂坐同產兄楚王瑋事徙封常山後還復國在常山穿



井入地四丈得白玉方三四尺玉下有石其中有龜長二尺餘  
時人以爲復國之祥

宋文帝元嘉十九年四月戊申白龜見吳興餘杭太守文道恩以  
獻

元嘉二十年四月辛卯白龜見吳興餘杭揚州刺史始興王濬以  
聞

元嘉二十四年十月甲午揚州刺史始興王濬獲白龜以獻

孝武帝大明三年三月戊子毛龜見宣城廣德太守張辨以獻

大明四年六月壬寅車駕幸藉田白龜見於千畝尚書右僕射劉  
秀之以獻

大明七年八月乙未毛龜見新安王子鸞第獲以獻

明帝泰始二年八月丙辰朔四眼龜見會稽會稽太守巴陵王休

若以獻

泰始二年八月丙寅六眼龜見東陽長山文如爻卦太守劉總以  
獻

泰始六年九月己巳八眼龜見吳興故鄣太守褚淵以獻

明帝泰豫元年十月壬戌義興陽羨縣獲毛龜太守王蘊以獻

龍馬者仁馬也河水之精高八尺五寸長頸有翼傍有垂毛鳴聲  
九哀一作音

騰黃者神馬也其色黃王者德御四方則出白馬未鬣王者任賢  
良則見澤馬者王者勞來百姓則至夏馬駟黑身白鬣尾殷馬駱  
白身黑鬣尾周馬駢赤身黑鬣尾

漢章帝元和神馬見郡國

晉懷帝永嘉六年二月壬子神馬鳴南城門



晉孝武帝泰元十四年六月甲申朔寧州刺史費統上言所統晉寧之滇池縣舊有河水周回二百餘里六月二十八日辛亥神馬二匹一白一黑忽出於河中去岸百步縣民董聰見之白象者人君自養有節則至

宋文帝元嘉元年十二月丙辰白象見零陵洮陽

元嘉六年三月丁亥白象見安成安復江州刺史南譙王義宣以聞

漢武帝元狩二年三月南越獻馴象

白狐王者仁智則至

晉成帝咸康八年十月燕王慕容皝上言白貉見國內

赤熊佞人遠姦猾息則入國

宋文帝元嘉二十年十二月白熊見新安歙縣太守到元度以獻

九尾狐文王得之東夷歸焉

漢章帝元和中九尾狐見郡國

魏文帝黃初元年十一月甲午九尾狐見甄城又見譙

白鹿王者明惠及下則至

漢章帝建初七年十月車駕西巡得白鹿於臨平觀

漢章帝元和中白鹿見郡國

漢安帝延光三年六月辛未白鹿見右扶風雒

延光三年七月白鹿見左馮翊

漢桓帝永興元年二月白鹿見張掖

魏文帝黃初元年郡國十九言白鹿及白麋見

晉武帝泰始八年十月白鹿見扶風雒州刺史嚴詢獲以獻

晉武帝太康元年三月白鹿見零陵泉陵



太康元年五月甲辰白鹿見天水西縣太守劉辛獲以獻

太康三年七月壬子白鹿見零陵零陵令蔣微獲以獻

晉惠帝元康元年九月乙酉白鹿見交趾武寧

晉愍帝建武元年五月戊子白鹿見高山縣

晉元帝太興三年正月白鹿二見豫章

太興三年四月白鹿見晉陵延陵

晉元帝永昌元年九月白鹿見江乘縣

晉成帝咸和四年五月甲子白鹿見零陵洮陽獲以獻

咸和四年七月壬寅長沙郡邏吏黃光於南郡道遇白鹿驅之不

去直來就光追尋光二百餘步光遂抱取遣吏李堅奉獻

咸和九年八月己未白鹿見長沙臨湘

晉成帝咸康二年七月白鹿見豫章望蔡太守桓景獲以獻

晉孝武太元十六年三月癸酉白鹿見豫章望蔡獲以獻

太元十八年五月辛酉白鹿見江乘江乘令田熙之獲以獻

太元二十年九月丁丑白鹿見巴陵清水山荊州刺史殷仲堪以

獻

晉安帝隆安五年十一月白鹿見長沙荊州刺史桓玄以聞

宋文帝元嘉五年七月丙戌白鹿見東莞莒縣岫峨山太守劉玄

以聞

元嘉九年正月白鹿見南譙譙縣豫州刺史長沙王義欣以獻

元嘉十四年白鹿見文鄉

元嘉十七年五月甲午白鹿見南汝陰宋縣太守文道恩以獻

元嘉二十年八月白鹿見譙郡蘄縣太守鄧琬以獻

元嘉二十二年二月白虎見建康縣揚州刺史始興王濬以聞



元嘉二十二年二月辛未白鹿見南康瀨縣南康相劉興祖以獻  
元嘉二十三年二月戊戌白鹿見交州交州刺史檀和之以獻  
元嘉二十三年六月丙辰白鹿見彭城彭城縣征北將軍衡陽王  
義季獲以獻

元嘉二十七年二月壬辰朔白鹿見濟陰徐州刺史武陵王諱以  
聞

元嘉二十九年八月癸酉白鹿見鄱陽南中郎將武陵王諱以獻

元嘉三十年十一月壬午白鹿見南琅邪南琅邪太守王僧虔以  
獻

元嘉三十年十一月癸亥白鹿見武建郡雒州刺史朱修之以獻

孝武帝孝建三年三月庚子白鹿見臨川西豐縣

孝武帝大明元年四月申申白鹿見南平

大明二年四月巳丑白鹿見桂陽郴縣湘州刺史山陽王休祐以  
獻

大明二年正月癸巳白鹿見南琅邪江乘南徐州刺史劉延孫以  
獻

大明三年三月辛卯白鹿見廣陵新市太守柳光宗以聞

大明五年五月丙寅白鹿見南東海丹徒南徐州刺史劉延孫以  
獻

大明八年六月甲子白鹿見衡陽郡湘州刺史江夏王世子伯禽  
以獻

明帝泰始二年二月乙亥白鹿見宣城宣城太守劉韞以聞

泰始五年二月乙亥白鹿見長沙湘州刺史劉韞以獻

泰始六年十二月乙未白鹿見梁州梁州刺史杜幼文以聞



後廢帝元徽三年二月甲子白鹿見鬱洲青冀二州刺史西海太守劉善明以獻

三角獸先王法度修則至 闕

一角獸天下平一則至 闕

六足獸王者謀及衆庶則至 闕

比肩獸王者德及矜寡則至 闕

獬豸知曲直獄訟平則至 闕

白虎王者不暴虐則白虎仁不害物

漢宣帝元康四年南郡獲白虎

漢章帝元和二年以來至章和元年凡三年白虎二十九見郡國

漢安帝延光三年八月戊子白虎二見潁川陽翟

漢獻帝延康元年四月丁巳饒安縣言白虎見又郡國二十七言

白虎見

吳孫權赤烏六年正月新都言白虎見

赤烏十一年五月鄱陽言白虎仁

晉武帝泰始元年十二月白虎見河南陽翟

泰始元年十二月白虎見弘農陸渾

泰始二年正月己亥白虎見遼東樂浪

泰始二年正月辛丑白虎見天水西

晉武帝咸寧三年二月乙丑白虎見沛國

晉武帝太康元年八月白虎見永昌南罕

太康四年七月丙辰白虎見建平北井

太康十年十月丁酉白虎見犍爲

晉成帝咸和八年五月己巳白虎見新昌縣



晉簡文帝咸安二年三月白虎見豫章南昌縣西鄉石馬山前

晉孝武泰元十四年十一月辛亥白虎見豫章郡

泰元十九年二月行輦令劉啟期言白虎頻見

泰元十九年二月行溫令趙邳言白虎頻見

晉安帝隆安五年十一月襄陽言騶虞見於新野

宋武帝永初元年八月癸巳白虎見枝江

少帝景平元年十月白虎見桂陽耒陽

文帝元嘉十九年十月白虎見弋陽期思二縣南豫州刺史武陵王諱以聞

元嘉二十五年二月巳亥白虎見武昌武昌太守蔡興宗以聞

元嘉二十五年十一月丁丑白虎見蜀郡二赤虎導前益州刺史陸徽以聞

元嘉二十六年四月戊戌白虎見南琅邪半陽山二虎隨從太守王僧達以聞

孝武孝建三年三月壬子白虎見臨川西豐

白狼宣王得之而犬戎服

闕

白麀王者刑罰理則至

晉武帝咸寧元年四月丙戌乙卯白麀見琅邪趙王倫以獻

咸寧三年七月壬辰白麀見魏郡

晉武帝太康三年八月白麀見梁國蒙梁相解隆獲以獻

太康五年九月巳酉白麀見義陽

太康七年五月戊辰白麀見汲郡

晉成帝咸和九年五月癸酉白麀見吳國吳縣內史虞潭獲以獻

晉穆帝永和元年八月白麀見吳國吳縣西界包山獲以獻



永和八年十二月白麀見丹陽永世令徐該獲以獻

永和十二年十一月庚午白麀見梁郡梁郡太守劉遂獲以獻

晉安帝隆安五年十一月白麀見荊州荊州刺史桓玄以聞

宋少帝景平元年五月癸未白麀見義興陽羨太守王準之獲以獻

景平二年六月白麀見南郡江陽太守王華獻之太祖太祖時入奉大統以爲休祥

文帝元嘉五年四月乙巳白麀見汝南武津太守鄭據獲以獻

元嘉十二年正月白麀見東萊黃縣青冀州刺史王方回以獻

元嘉十九年五月山陽張休宗獲白麀南兗州刺史臨川王義慶以獻

元嘉二十八年八月白麀見江夏安陸內史劉思考以獻

元嘉二十五年二月己丑白麀見淮南太守王休獲以獻

元嘉二十五年四月戊午白麀見南琅邪太守王遠獲以獻

元嘉二十五年五月辛未朔華林園白麀生二子皆白園丞梅道念以聞

元嘉二十六年五月丙戌白麀見馬頭豫州刺史南平王鑠以獻

元嘉二十七年正月己丑白麀見濟陰徐州刺史武陵王諱以聞

元嘉二十七年四月癸丑華林園白麀生一白子園丞梅道念以聞

元嘉二十九年六月壬戌白麀見晉陵旣陽南徐州刺史始興王濬以獻

孝武帝孝建三年六月癸巳白麀見廣陵南兗州以獻

孝武帝大明元年七月丁丑白麀見東萊曲城縣獲以獻



大明二年正月壬戌白麀見山陽山陽內史程天祚以獻  
大明二年二月辛丑白麀見濟北濟北太守殷孝祖以獻  
大明五年九月己巳白麀見南陽雍州刺史永嘉王子仁以獻  
大明六年四月戊辰白麀見滎陽湘州刺史建安王休仁以獻  
大明七年正月庚寅白麀見南陽荊州刺史臨海王子頊以獻  
大明七年六月己巳白麀見武陵臨沅太守劉衍以獻  
大明七年九月癸未白麀見南陽雒州刺史劉秀之以獻  
明帝泰始三年五月癸酉白麀見南東海丹徒南徐州刺史桂陽  
王休範以獻  
泰始三年五月己卯白麀見北海都昌青州刺史沈文秀以獻  
泰始五年正月癸卯白麀見汝陰樓煩豫州刺史劉劭以獻  
明帝泰豫元年十月壬戌白麀見義興國山太守王蘊以獻

後廢帝元徽元年正月甲午白麀見海陵寧海寧海太守孫嗣之  
以獻

文帝元嘉二十三年五月甲寅東宮隊白從陳超獲黑麀於肥如  
縣皇太子以獻

元嘉二十三年十月辛巳東宮將魏榮獲青麀於秣陵

元嘉十年十二月營城縣民成公會之於廣陵高郵界獲白麀鹿  
以獻

孝武帝大明元年二月己亥白鹿見會稽諸暨縣獲以獻

銀鹿刑罰得共民不爲非則至 闕

赤兔王者德盛則至 闕

比翼鳥王者德及高遠則至 闕

赤雀周文王時銜丹書來至



晉愍帝建興三年四月癸酉赤雀見平州府舍

宋文帝元嘉二十年五月赤雀集南平郡府內史臧綽以聞

孝武帝孝建元年五月己亥臨沂縣魯尚斯軍人於城上獲赤雀

太傅假黃鉞江夏王義恭以獻

福草者宗廟肅則生宗廟之中

闕

蒼烏者賢君修行孝慈於萬姓不好殺生則來

宋孝武帝大明元年五月丁丑蒼烏見襄陽縣

大明二年四月甲申蒼烏見襄陽雍州刺史王玄謨以獻

甘露王者德至大和氣盛則降

柏受甘露王者耆老見敬則柏受甘露

竹受甘露王者尊賢愛老不失細微則竹篔受甘露

漢宣帝元康元年三月甘露降未央宮

漢宣帝神雀二年二月甘露降京師

神雀四年春甘露降京師

漢宣帝五鳳二年正月甘露降京師

漢成帝元延四年三月甘露降京師

漢光武建武中元元年五月郡國上甘露降

漢明帝永平十七年五月戊子夜帝夢見光武帝光烈皇后夢中喜覺悲不能寐明旦上陵百官胡客悉會太常丞上言其日陵樹葉有甘露帝令百官采甘露帝自伏御牀視太后莊器奩中物流涕敕易奩中脂澤之具

永平十七年春甘露仍降京師

漢章帝元和中甘露降郡國

漢安帝延光三年四月丙戌甘露下沛國豐



延光三年七月甘露下左馮翊頻陽

漢桓帝延熹三年四月甘露降上郡

漢桓帝永康元年八月甘露降巴郡

魏文帝初郡國三十七言甘露降

魏少帝甘露元年五月鄴及上洛並言甘露降

魏元帝咸熙二年四月南深澤縣言甘露降

吳孫權黃武前建業言甘露降

黃武二年五月曲阿言甘露降

吳孫權赤烏元年三月零陵言甘露降

赤烏九年四月武昌言甘露降

吳孫權嘉禾五年三月武昌言甘露降於禮賓殿

吳孫皓甘露元年四月蔣陵言甘露降

晉武帝泰始十年四月乙亥甘露降西河離石

晉武帝咸寧元年四月丙戌甘露降張掖

咸寧元年五月戊午甘露降清河繹幕

咸寧元年九月甘露降太原晉陽

咸寧二年五月戊子甘露降玄菟郡治

咸寧三年六月戊申甘露降巴郡南充國

晉武帝太康五年三月乙卯甘露降東宮

太康七年四月甘露降京兆杜陵

太康七年五月甘露降魏郡鄴

晉惠帝元康四年五月甘露降樂陵郡

晉愍帝建興元年六月甘露降西平縣

建興三年八月己未甘露降新昌縣



晉愍帝建武元年六月丁丑甘露降壽春

晉元帝大興三年四月甘露降琅邪費

晉明帝泰寧二年正月巴郡言甘露降

晉成帝咸和四年四月甘露降武昌郡閣前桺樹太守詡以聞

咸和六年三月甘露降寧州城內北園榛桃樹刺史以聞

咸和七年四月癸巳甘露降京邑揚州刺史王導以聞

咸和八年四月癸卯甘露降廬江襄安縣蔣冑家

咸和八年四月癸卯甘露降宣城宛陵縣之須里

咸和九年四月甲寅甘露降吳國錢唐縣右鄉康巷之桺樹

咸和九年十二月丙辰甘露降建平陵

咸和九年十二月丁巳甘露降武平陵

晉成帝咸康元年四月癸卯甘露降西堂桃樹

咸康二年三月甲戌

鬱林城內

咸康二年四月甘露降西堂又降尚書都坐桃樹又降會稽永興

縣眾官畢賀戊午甘露降會稽山陰縣又降吳興武康縣庚申又

降武康

咸康三年四月戊午甘露降殿後桃李樹五月甘露降義興陽羨

縣柞樹東西十四步南北十五步

咸康七年四月丙子甘露降彭城王紘第內眾官畢賀

晉穆帝永和元年三月甘露降廬江郡內桃李樹太守永以聞

永和五年十一月太常劉邵上崇平陵令王昂即日奉行陵內甘

露降於玄宮前殿

永和五年十二月巳酉甘露降丹陽湖孰縣西界劉敷墓松樹縣

令王恬以聞眾官畢賀



晉簡文帝咸安二年正月甘露降隨郡澠陽縣界桑木沾凝十餘里中

晉孝武帝泰元十二年八月甘露降寧州界內刺史費統以聞

泰元十五年閏月甘露降永平陵

泰元十六年十一月庚午甘露降句陽縣

泰元十七年二月甘露降南海番禺縣楊樹

晉安帝元興二年十月甘露降武昌王成基家竹

元興三年三月己卯甘露降丹徒

元興三年四月己酉甘露降蘭臺

宋武帝永初元年九月庚辰甘露降丹徒現山

永初元年十月庚午甘露降興寧永寧二陵彌冠百餘里

文帝元嘉三年閏正月己丑甘露降吳興烏程太守王韶之以聞

元嘉四年五月辛巳甘露降齊郡西安臨胸城

元嘉四年十一月辛未朔甘露降初寧陵

元嘉四年十一月己丑甘露降南海熙安廣州刺史江桓以聞

元嘉八年五月甘露降南海番禺

元嘉九年十一月壬子甘露降初寧陵

元嘉十一年八月甲辰甘露降費縣之沙里琅邪太守呂綽以聞

元嘉十三年二月丁卯甘露降上明巴山

元嘉十三年二月甘露降吳縣武康董道益家園樹

元嘉十三年三月甲午甘露降初寧陵

元嘉十六年三月己卯甘露降廣州城北門楊樹刺史陸徽以聞

元嘉十七年四月丁丑甘露降廣陵永福里梁昌季家南兗州刺

史江夏王義恭以聞



元嘉十七年甘露降高平金鄉富民邨方三十里中徐州刺史趙伯符以聞

元嘉十七年十一月乙酉甘露降樂遊苑

元嘉十八年五月甲申甘露降丹陽秣陵衛將軍臨川王義慶園揚州刺史始興王濬以聞

元嘉十八年六月甘露降廣陵廣陵孟玉秀家樹南兗州刺史臨川王義慶以聞

元嘉十九年五月丁卯甘露降建康司徒參軍督護顧俊之宅竹栒

元嘉十九年五月乙亥甘露降馬頭濟陽宋慶之園樹太守荀預以聞

元嘉二十一年甘露降益州府內梨李樹刺史庾俊之以聞

元嘉二十一年四月甘露頻降樂遊苑

元嘉二十一年四月甘露降彭城綏興里徐州刺史臧質以聞

元嘉二十一年四月甘露降義陽平陽太守龐秀之以聞

元嘉二十二年十一月辛巳甘露降南郡江陵方城里荊州刺史南譙王義宣以聞

元嘉二十二年十二月丁酉甘露降長寧陵陵令包誕以聞

元嘉二十三年二月丁未甘露降樂遊苑丞張寶以聞

元嘉二十三年九月丙子甘露降長寧陵陵令華林以聞

元嘉二十三年十二月庚子甘露降襄陽郡治雍州刺史武陵王諱以聞

元嘉二十三年十二月辛丑甘露頻降樂遊苑丞何道之以聞

元嘉二十四年二月巳亥庚子甘露頻降景陽山山監張績以聞



元嘉二十四年二月己亥癸卯三月丙辰甘露頻降景陽山華林園丞陳襲祖以聞

元嘉二十四年三月甲寅甘露降潯陽松滋江州刺史廬陵王紹以聞

元嘉二十四年四月癸未甘露降潯陽松滋丙申又降江州城內桐樹丁酉又降城北數里之中江州刺史廬陵王紹以聞

元嘉二十四年七月乙卯甘露降京師揚州刺史始興王濬以聞元嘉二十四年七月甘露降襄城治下無量寺雍州刺史武陵王

諱以聞

元嘉二十四年十月甲午甘露降魏興郡內太守韋寧民以聞

元嘉二十三年至二十四年十二月甘露頻降狀如細雪京都及郡國處處皆然不可稱紀

元嘉二十五年十一月庚辰甘露降南郡荊州刺史南譙王義宣以聞

元嘉二十五年十一月乙未甘露降丹陽秣陵巖山

元嘉二十六年三月壬午甘露降景陽山華林園丞梅道念以聞

元嘉二十六年三月庚辰癸巳甘露頻降武昌江州刺史廬陵王紹以聞

元嘉二十六年四月甲辰丙午戊申甘露頻降豫章南昌太守劉思考以聞

元嘉二十六年七月甘露降南郡江陵荊州刺史南譙王義宣以聞

元嘉二十七年四月乙卯丙辰丁巳甘露頻降豫章南昌戊午午時天氣清明有綵霧映覆郡邑甘露又自雲降太守劉思考以聞



元嘉二十七年五月甲戌甘露降東海丹徒南徐州刺史始興王濬以聞

元嘉二十八年二月戊辰甘露降鍾山延賢寺揚州刺史廬陵王紹以聞

元嘉二十八年二月壬午甘露降徽音殿前果樹

元嘉二十八年二月甘露降合歡殿後香花諸草

孝武帝孝建元年三月丙辰甘露降華林園

孝建二年三月己酉甘露降丹陽秣陵中里路與之墓樹

孝建二年三月辛亥甘露降長寧陵松樹

孝建二年三月甘露降襄陽民家梨樹

孝建二年三月戊午甘露降丹陽秣陵尚書謝莊園竹林莊以聞

孝武帝大明元年四月癸卯甘露降華林園桐樹

大明三年三月己卯甘露降樂遊苑梅樹

大明三年三月戊子甘露降宣城郡舍太守張辯以聞

大明四年正月壬辰甘露降初寧陵松樹

大明四年二月丙申甘露降長寧陵松樹

大明四年二月乙巳甘露降丹陽秣陵龍山丹陽尹孔靈符以聞

大明五年四月辛亥甘露降吳興安吉太守歷陽王子項以聞

大明五年四月乙卯甘露降吳興烏程太守歷陽王子項以聞

大明六年二月戊午甘露降建康靈耀寺及諸苑園及秣陵龍山

至於婁湖是日又降句容江寧二縣

大明七年三月丙申甘露降尋陽松滋太守劉暉以聞

大明七年四月己未甘露降荊州城內刺史臨海王子項以聞

大明七年十二月辛丑朔甘露降吳興烏程令苟卞之以聞



明帝泰始二年四月己未甘露降上林苑苑令徐承道以獻

泰始二年四月庚申甘露降華林園園令臧延之以獻

泰始二年五月己未甘露降丹陽秣陵縣舍齋前竹丹陽尹王景文以獻

泰始三年十一月庚申甘露降晉陵晉陵太守王蘊以聞

泰始三年十一月癸亥甘露降南東海丹徒建岡徐州刺史桂陽王休範以聞

泰始三年十二月壬午甘露降崇寧陵揚州刺史建安王休仁以聞

後廢帝元徽四年十一月乙巳甘露降吳興烏程太守蕭惠明以聞

順帝昇明二年十二月甘露降建康禁中里

昇明二年十一月甘露降南東海武進彭山太守謝朓以聞

昇明二年十一月甘露降吳興長城卞山太守王奐以聞

威香者王者禮備則常生

關







